

四庫全書

史部

欽定四庫全書

畿輔通志卷七十八

儒學

順天府

周

周醜子家

燕人江東駢臂子弓
授易燕周醜子家

漢

韓嬰

燕人孝文時為博士景帝時至常山太傅嬰
推詩人之意而作內外篇數萬言其語頗與

齊魯間殊淮南貢生授之燕趙間言詩者由嬰嬰亦以易授人推易意而為之傳燕趙間好詩故其易微唯韓氏自傳之武帝時嬰常與董仲舒論於上前其人精悍處事分明仲舒不能難也後其孫商為博士

韓生

涿郡人嬰之後也孝宣時以易微待詔殿中曰所受易即先太傅所傳也嘗受韓詩不如韓氏易深太傅故專傳之司隸校尉本受易於孟喜見生說易而好之即更從受焉

南北朝魏

平恒

字繼叔燕郡薊人耽勤讀誦多通博文自周繼魏帝王傳代之由貴臣升降之緒皆撰品

第號曰畧註合百餘篇安貧樂道廉貞寡欲不營資產衣食常不給官至秘書丞卒謚康

盧景裕

字仲儒范陽涿人少聰敏專經為學居拒馬河將一老婢作食妻子不自隨又避地大寧

山不營世業惟在註解常註周易尚書孝經論語禮記老子齊文襄入相於地開講景裕解所註周易理義精微吐發閒雅從容往復無際可尋士君子嘆美之景裕弟辯以大戴未有解詁乃註之景裕曰昔汝兄註小戴今汝註大戴庶纂前修矣景裕後補齊王開府屬卒於晉陽辯詳名臣傳

唐

盧履水

幽州范陽人經都官尚書義禧五世孫開元五年仕歷右諫闕建言古者父在為母背服

徹靈而心喪武后始請同父三年非是請如禮元宗疑之下百官議刑部郎中田再思曰父在為母三年高宗實行之者令已久何必乎先帝之旨闕人子之情履水因言上元中父在為母三年后雖

請未用也逮垂拱始行之禮女子無專道父在為母服其統一尊也昔武后陰躋篡謀豫自光崇升暮齊抗斬衰服而乘陵唐室以啓豐階臣將以正夫婦之綱非特母子間也於時議禮者交口沸騰七年乃下詔父在為母其心喪三年後復水以官卒

元

曹

鑑字克明宛平人通五經大義用郝彬薦為鎮海書院山長元統初同僉太常禮儀院鑑習典故達古今議事援據禮經君子多之仕至禮部尚書卒謚文穆

明

秦

亨

字子真順天人究性理之學通五經尤長於易以易學見知於文皇帝永樂初召至京師

欲處以顯職力辭就教乃除荏平教諭遷永寧府教授訓迪有方弟子多有成就已而從尚書黃福征交趾多贊畫功乞休歸正統間卒

武周文

大興人洪武末以明經入侍燕邸永樂初召為侍講學士上嘗謂胡廣曰朕在藩邸喜觀

易時官寮亦有通曉者不如武周文言之切實次日周文入謝遂以老乞休

李天麟

字仲仁順天人發明理學言簡而醇嘗曰孔門宗旨只是求仁惟顏曾得其宗若舍求仁

之外別立宗旨恐非授受之真詮萬歷中官知府卒

本朝

張烈

字武承大興人少聰穎讀書數行俱下長而潛心性命之學毅然以閑邪衛道為己任登

康熙九年進士授內閣中書十八年試博學宏詞
科遷翰林院編修轉春坊贊善纂修明史典訓及
四書講義諸書恪勤厥職編輯精當性至孝事繼
母委曲承順人無間言生平多所著述皆有闕人
心世道之女年六
十四卒祀鄉賢

永平府

南北朝魏

盧

醜

昌黎人世祖為監國醜以篤學博聞授世祖
經後以師傅舊恩賜爵濟陰公太和中以老

免自

元

姚

樞字公茂柳城人太宗時為燕京行臺郎中後
棄官攜家輝州作廟奉孔子及宋儒周元公

等像時許衡在魏至輝就錄程朱所註書以歸曰
曩時所授皆非今始聞進學之序也世祖在潛邸
詢以治道樞首陳二帝三王之道世祖
嘉納之累官翰林學士承旨卒謚文憲

姚

燧

字端甫樞從子樞與許衡講學蘇門燧年甫
十二即從之遊後衡以祭酒教貴胄奏召舊

弟子十二人燧與焉累官江西行省參政仁初
徵拜太子賓客辭不受以病告歸卒於家謚曰文
燧先在蘇門讀通鑑綱目嘗病國統散於逐年不
能一覽得離合之槩及告病歸著國統離合表年
經而國緯如史記諸表附朱子凡例之後
其學由窮理致知反躬實踐為許衡高弟

明

陳恕

字道達，澤州人。自少以德行稱。好性理學。景泰間舉鄉試，為開封同知。考滿乞歸，乘一蹇

入城，人不識其從宦歸也。

本朝

桑鳳翥

玉田人。少聰穎，博極群書，獨精易理。弱冠補邑弟子員，督學見其文，曰：「此鉅儒也。」屢試輒

闌，不偶。退而著述，教授生徒。及卒，門人私謚肅範先生。所著有四書集義、大易直解、古今人物考等

書卒祀

鄉賢

李集鳳

山海衛人。幼即端嚴，以聖賢自期。及長，淹通群籍。凡濂洛關閩之書，無不究悉。尤善春秋

彙先儒註解，討辨詳核。歷三十年，凡四易藁。然後成書六十互卷，名曰春秋辨疑。海內稱之。後官河

南洛陽丞卒邑人請從祀周公廟
直隸於康熙五十三年祀鄉賢

保定府

南北朝梁

許懋

字昭哲高陽新城人年十四入太學授毛詩
旦領師說幕而覆講座下聽者常數百人撰

風雅比興義十五卷或行於世武帝集儒學之士
草封禪儀懋建議獨以為不可詔從之子亨字亨
道少傳家業孤介有節行王僧辨
之誅也亨以故吏抗表請葬之

魏

陳奇

字修奇河北人少孤力學博通九經尤精於
易嘗非馬融鄭康成解經失旨因作註釋召

補秘書太尉高允嘉其
遠致通識非凡學所窺

金

韓中

滿城人治左氏春秋嗜烟霞甘
澹泊儀型鄉里人皆化於禮讓

元

劉因

字夢吉容城人父述邃於性理之學因天資
絕人初為經學究訓詁疏釋之說輒嘆曰聖

人精義殆不止是及得周程張即朱呂之書一見
能發其微性不苟合不妄交家雖貧非其義一介
不取家居教授師道尊嚴至元間徵授贊善大夫
未幾辭歸後徵拜集賢學士以疾固辭卒贈容城

郡公諡

文靜

王

恂

字敬甫唐縣人父良潛心伊洛之學恂讀書過目成誦仕為太子贊善每侍講讀必發明

綱常之道及歷代興亡治忽之所以然常與許衡郭守敬等定授時歷官至太史令卒贈定國公諡

文肅子寬寶並傳家學

王

結

字儀伯定興人從太史董朴受經深於理學歷官武宗至順帝八朝終中書左丞卒贈太

原郡公諡文忠丞相張珪曰王結非聖賢之書不讀非仁義之言不談晚遂於理著易說一卷並詩

文十五卷行世

張克讓

字允恭清苑人受業趙省齋之門博極群書不事章句由體認而得者居多生平敦義行

有德惠於族里及將卒謂家人曰人之為學若節唯在死生之際死而不亂學之力也言訖而逝

明

劉大寧

字汝功完縣人天資穎異博極群書尤邃太極圖說以理學名成化間領鄉薦知安陸縣

有政聲

楊國召

定興人年三十謝制舉業志性命學尤好談太極圖及邵子皇極經世能發其言外旨經

術深醇被教者盡成名爲人擬之胡安定

王尚武

字健夫新安人性孤介讀書根極理要以貢入太學有巨璫招之不往任太原令得罪巨

室遷晉府審理告歸構室兩楹蒔蔬杞甕所若有樂汲說學者稱爲通滄先生

王孫蕃

雄縣人由舉人崇禎中累官御史劾大璫之奏事不實者直聲大著致仕歸蕃於書無所

不讀尤邃於周易嘗獨處一樓閉關自課號居易道人日披龍溪陽明諸集所作文皆有闢人心世道之言

本朝

孫奇逢

字啓泰容城人年十七舉於鄉慨然有經濟志與定興鹿正俱以儒使聞左光斗被逮過

白溝奇逢延之月下縱騎環列慷慨不異平時後倡道蘇門以紹往聞來為己任遠近問業者接踵性高介不就徵

刁 已

祁州人性至孝事寡母晨昏唯謹年逾六十無少間生平窮究理學一以程朱為宗旨所著有斯文正統用陸集等書及卒鄉人私謚文孝先生康熙三十八年祀鄉賢

陳

洲

字半千安州人性倜儻好善刻苦力行為容城孫奇逢高弟淹貫群書尤得力於陽明傳

習錄當明末盜起流離相屬於道洲收養難婦數十人於州城朝陽觀中事定送歸其里又遍收逢間棄兒飼之全活者甚衆常遊大名有史姓者以事繫於官洲拯之出一日攜其女為謝洲正色曰吾一生急人之難豈有利人子女以為報者乎驅之去舉順治庚子鄉試未仕而卒子鶴齡康熙甲子舉人孫惠榮惠正俱成進士惠華狀元及第人以為陰德之報

河間府

秦

顏芝

河間人焚書之後芝藏有孝經古本漢初芝子貞出之凡十八章

漢

董仲舒

廣川人少治春秋景時為博士下帷講誦三年不窺園進退容止非禮不行學士皆師

尊之武帝時以賢良對策為江都相徙膠西武帝表章六經抑黜百家立學校之官舉茂才孝廉皆自仲舒發之及去位家居以修學著書為業朝廷有大議使就問之其對皆有明法年老以壽終祠

在景州

本朝康熙四十二年

聖祖

仁皇帝御書闡道醇儒四字勒石旌之

孟

但

廣川人傳田何易官至太子門大夫

北齊

馬敬德

河間人從徐遵明學詩禮通大義尤精左氏春秋教授燕趙間生徒甚衆舉秀才授國子

助教齊武成擇為後主師傅後拜祭酒子元熙字長明少傳父業武平中以孝經入授太子

張思伯

河間樂成人善左氏傳嘗撰刊例十卷亦治毛詩章句以二經教授齊安王廓武安初為

國子博士

劉晝

字孔昭阜城人少孤貧受學李寶鼎授以三禮又就馬敬德習服氏春秋俱通大義知鄴

令宋世良家有書五十卷乃請為其子博士恣意披覽晝夜不息刺史李瑱嘗欲以晝應詔先告之晝曰公自為國舉才何勞語晝後竟不仕卒於家

權會

字正理河間鄭人少受鄭易妙盡精微詩書三禮文義該洽仕齊初為四門博士僕射崔

進甚敬重焉累遷國子博士臨機答難酬報如
響由是為諸儒所推重呈建中加中散大夫

邢

峙

字士峻河間鄭人通三禮左氏春秋仕齊初
為四門博士遷國子助教以經入授皇太子

厨宰進太子食菜有邪蒿峙令去之曰此菜有不
正之名非殿下宜食文宣聞而嘉之歷遷清河太

守

周

熊安生

字植之阜城人博通五經專以三禮教授周
武帝時詔給安車入朝勅令參議五禮宣政

元年拜露門博士安生學為儒宗當時若劉焯劉
炫輩皆受其業所著周禮禮記孝經義疏並行於
世

隋

劉

炫

字光伯景城人開皇中奉勅與著作郎王邵同修國史俄直門下省以待顧問煬帝初修

律令授太學博士後歸鄉里以教授為業卒於家所著有論語述議春秋攻昧五經正名等書行世

唐

彭景直

河間人中宗景龍末為太常博士時獻昭乾三陵皆日祭景直言禮陵不日祭宗廟有月祭宜罷諸陵祭如禮便帝不從後景直歷官禮部侍郎卒

高重

修人士廉五世孫以明經中第累擢國子祭酒文宗好左氏春秋命分列國各為書成四

十篇與鄭覃刊定九經於石出為鄂岳觀察使卒贈少保

本朝

蘇俊大

交河人幼值父病侍湯藥衣不解帶者數月及長究心經籍尤長於春秋遂以麟經教授

鄉里生徒甚衆由選拔貢生任懋州推官卒從子銓鑛銑皆以春秋先後成進士銓官大理寺少卿

所著有四書講義春秋胡傳句解諸書卒祀鄉賢

天津府

南北朝魏

刁冲

字文朗饒安人十三而孤孝慕過人學通諸經當世服其精博延昌中司徒高峯擅恣威

福冲抗表極言辭旨懇直神麈末以嫡襲祖廕東安侯卒諡安憲先生

齊

李

鉉

字寶鼎南皮人家素貧常春夏務農秋冬乃入學年十六從饒陽李周仁受毛詩尚書章

武劉子猛禮記常山房蚪受周官儀禮饒陽鮮于靈馥受左氏又與州里楊元懿河間宗惠振等結友詣徐遵明受業潛居討論撰定孝經論語毛詩三禮義疏及三傳異同周易義例合三十餘卷仕終國子博士

刁

采

字子溫渤海人少好學綜習經史尤留心禮儀居母喪以孝聞高祖鎮晉陽令教授諸子

天保初除國子博士
參議律令平於官

劉軌思

渤海人說詩甚精少事同郡劉敬和敬和事同郡程歸則故其鄉曲多通詩者軌思天統

中任國
子博士

鮑季詳

渤海人甚明禮聽其離文析句自然大畧可解兼通左氏春秋少時恒為李寶鼎都講後

亦自有徒眾諸儒稱之天統時卒於博士從弟長暄兼通禮傳武平末為任城王掾齊亡後卒於家

正定府

南北朝魏

張惠普

常山人精於三禮兼善春秋百家之說仕魏累官東豫州刺史多所進舉篤於故舊卒謚

宣公

房虬

常山人善周官儀禮授南皮李寶鼎

隋

房暉遠

字崇儒真定人高祖授禪召為太常博士牛弘每稱為五經庫遷國子博士仁壽中卒暉

遠治三禮春秋三傳詩書周易兼善圖緯恒以教授為務遠方負笈而從者動以千計

唐

趙冬曦

鼓城人進士擢第歷左拾遺神龍初上書言律令曰法易知則下不敢犯而遠禍文義深

則吏朋而為姦其以準加減比附之類皆使勿用當時稱之開元初入集賢殿修撰知史官事終國

子祭酒

元

安

熙

字敬仲，崇城人。聞容城劉因之學，心向慕焉。將造其門，而因已歿。乃從因門人問其緒說。

潛心朱子之書，尊信力行。家居教授垂數十年。四方來學者多所成就。既卒，鄉人為立祠門人蘇天

爵為輯
其遺文

陳思謙

正定人。警敏好學，至順初拜監察御史。建明八事累遷御史中丞。卒追封魯國公。諡通敏。

思謙於凡名物度數綱紀本末考訂詳究尤深。於邵子皇極經世書

何體仁

字德元，母杜人。幼穎悟，隨父官新淦。師名儒宋梅洞，博通經史，尤精於易。延祐間舉茂才。

授奉縣教諭。教人去浮華，敦本實。學徒感化，及滿隱居不仕。修室谷齋。終日端坐其中，自號滋川佚逸。

順德府

漢

韓伯高

鉅鹿人從淮陽薛漢受韓詩漢弟子數百人唯伯高與健為杜哲會稽澹臺敬伯最知名

南北朝魏

游肇

廣平任人博綜經史善周易毛詩尤精三禮為易集解撰冠婚儀詩賦表啓凡七十五篇

孝文初為內秘書侍郎累遷魏郡太守平諡文貞

元

董朴

字太初順德人自幼強記師事樂舜咨劉道濟幡然有求道之志至元中用薦為陝西知

法官未幾以親老歸養台不起命以翰林修撰致仕卒朴所學自六經及孔孟先儒微言融貫為人清而通和而介學者稱龍崗先生

林起宗

字伯始內邱人自幼力學以聖賢自期聞容城劉因名往從之立門三日因嘉其志授以

程朱正傳深得道學之旨既歸教授鄉里弟子從學者甚衆著有志學指南心學淵源二圖及大學論語諸圖魯家記等書行世

明

喬中和

字還一內邱人讀書能參奧旨常閱大小二熟處遠近之來學者編摩經籍寒暑無間晚

年學易獨出心解為易說一編

廣平府

漢

毛

萇

趙人治詩為河間獻王博士授同國貫長卿於是世傳毛詩之學

賈

公

趙人從賈誼受左氏傳訓故為河間獻王博士子長卿為蕩陰令授清河張禹長子禹與

蕭望之同時為御史數為望之言左氏望之善之上書數以稱說後望之為太子太傅薦禹於宣帝徵禹待詔未及問會疾卒

胡

常

字少子清河人以明穀梁春秋為博士部刺史又傳左氏受號徐教

房

植

字伯武清河人以經學知名永和為李固薦與陳留楊倫河南尹存東平王惲陳國何

臨同日
微用

南北朝魏

監伯陽

清河人頓卯董徵從受論語毛詩春秋周易徵之學皆自伯陽發之

馮元興

字子威肥鄉人少有操尚就中山張吾貴常山房虬學通禮傳教授常數百人舉秀才召

為檢校御史太保崔光引為侍讀授肅宗杜氏春秋累遷安東將軍光祿大夫卒

崔瑾

清河人負性穎敏篤志經學聞大儒徐遵明通鄭氏易往受學焉

元

竇默

字子聲肥鄉人幼知讀書毅然有立志謝憲子以伊洛性理之書授之嘗與姚樞許衡講

習至忘寢食繼以經術教授由是知名世祖在潛邸召問治道默首以三綱五常對又言帝王之道在誠意正心世祖即位拜翰林侍講學士至元二十七年卒追封魏國公謚文正子履集賢大學士

明

劉

誠

字則明雞澤人天順進士授翰林院檢討改秀王府長史以禮輔導甚見敬重嘗著周易

衍辭及皇極經世洪範補註等書累官湖廣參議卒

蔡國熙

字春臺永年人少書起凡入聖四字於坐側沉心性命之學由進士為戶部郎與羅近溪

耿楚侗相劇切出為蘇州守建中吳書院聚徒講學以治最入覲累遷山西提學副使歸

宋學道

字仲明永年人幼居母喪墓廬三年人稱其孝萬歷中由進士知長子縣以孝友禮讓教

民調封卯塞河有功丁艱歸構社學一區與生徒講格致精一之旨所著有中語心語廣道詮根心解等書學者稱哲陽先生

申靈孚

字洙源永平人博覽經史邃於理學言動方嚴一介不苟舉萬歷丁卯鄉試知鄒平縣甫

匝月即掛冠歸臨終自書順受其正無忝所生而卒

趙

肅

難澤人以歲貢生任戶部司務累遷負外郎操履清介有屬吏餽金三百肅立却之致政

家居究心經學所著有詩經會意等書行世

大名府

漢

索盧敖

濮陽人以尚書教授子弟千餘人先武徵拜諫議大夫數獻忠諫尋以病去

晉

束皙

元城人官至尚書郎後罷歸卒市里為之廢業所著有五經通論發蒙記補亡詩文集數

十篇

南北朝魏

董徵

字文發頓邱人年十七師清河監伯陽受論語毛詩周易春秋就河內高望崇受周官後

於博陵劉獻之通受諸經數年之中大義精練請授生徒太和末為西門小學博士永安初加平東

將軍以老乞歸卒諡文烈

唐

馬嘉運

繁水人貞觀初為越王東閣祭酒退隱白鹿山生徒受業者至千人十一年召拜弘文館

學士以孔穎達正義繁雖故按撫其疵當世諸儒服其精高宗為太子引侍講宮中終國子博士

宋

王

豫

字天悅魏縣人隱居樂道精於易數開邵康節居蘇門欲以所得於易者究之語三日乃

盡得其所未聞始大驚服舍其學而學焉

金

張特立

字文舉東明人泰和三年進士授萊州節度判官正大四年拜監察御史當路者忌其直

左遷邳州判官金亡優游田里日與門弟子講學
元世祖初降璽書賜號中庸先生所著有易集說

歷年係
事記

元

王

鶚字百一東明人世祖在藩邸召講孝經書易
及齊家治國之道每夜分乃罷及即位首授
翰林學士承旨制誥皆所裁定修遼金二史及卒
謚文康著論語集說一卷汝南遺事二卷應物集

卷十

潘

廸

元城人博學能文歷官國子司業集賢學士
所著易春秋中庸學述解及格物類編六經發

蒙行
於世

明

劉

矩字仲方開州人永樂辛丑第二人及第授翰林院編修遷修撰矩方正占朴有至行學問

宏深以明道橫渠為準範生平未嘗失口於人以病歸卒

王循吉

字宗一開州人潛心理學不事舉業齋居十年著五經圖說及帝王憂世心法諸圖說獻世宗下大臣議共奏曰此理儒也賜處士號以旌之並下所司修明道書院以教授生徒

邵永春

字子元長垣人以理學自任登嘉靖進士知南陵縣以循績擢御史累遷山西按察使告

歸益究心性命之學者有問學直指三大儒言行錄論孟大意等書行世

王一元

魏縣人由選貢登鄉薦潛心理學者有學庸主意行世天性孝友家庭之間雍雍如也臨

終囑其子曰無求墓誌
皆虛文祇增不德耳

宣化府

元

梁

樞宣德人初習詞賦輒棄去已聞京師建太極書院德安趙復講學其中徒步往從之既見

得復所書希賢錄讀之嘆曰伊尹顏回心同道同希之當在我也久之辭歸從學者日衆晚嗜易以觀象名軒學者稱象軒先生

武

恪字伯威宣德人初以神童遊學江南吳澄薦入國學明宗在藩邸選為說書秀才及出鎮

遣歸居陋巷教授子弟文宗知其名除秘書典簿丁母憂歸屢薦不起生平好讀周易終日危坐或

問先生之學以何為本恪曰以
敬為本所著有水雲集若干卷

易州

元

敬

鉉字鼎臣易州人祖嗣徽父于淵兄鑑皆進士
起家鉉亦第進士為中都路提學者春秋備

忘四十卷仁宗朝命刻其書嘗隱居泰寧山學者
稱泰寧先生從孫儼字威卿嗜學善屬文大德中

累官平
章政事

冀州

漢

秦恭

信都人從平陵張山拊授尚書山拊師事夏侯建恭增師說至百萬言官至陽城內史

南北朝魏

劉蘭

武邑人年三十餘始受春秋詩禮於中山王保安家貧無以自給且耕且讀三年之後立

豐舍聚徒講書甚為精悉讀左氏五目一遍兼通五經又明陰陽博物多識為儒者所宗永平中仕

為國子助教

隋

劉焯

字士元信都昌亭人以儒學知名舉秀才射策甲科與李邵同修國史仍直門下省後與

楊素牛弘蘇威等共論古今滯義論難鋒起皆不能屈尋免官歸以教授著述為務與劉炫齊名時

人稱二劉馬論者以為數百年來博學通儒無出其右者

唐

孔穎達

字仲達衡水人八歲就學日記千言及長明春秋易書三禮善屬文通步厯貞觀初拜給

事中數進讜言遷國子祭酒與顏師古等受詔撰五經義訓凡百餘篇號曰義贊詔改為正義云

蓋文達

信都人博涉載籍尤明春秋三家刺史竇抗集耆儒劉焯孔穎達等講學文達依經辨論

一坐嘆服貞觀初拜集賢學士宗人文懿亦以儒學稱時號二蓋

元

馮復

字振文信都人少穎敏該貫經史世祖時舉茂才異等授廣平學正以母老病辭嘗除上

時政十事不報退居鄉里以奉親講學為事所居東陸學者稱東陸先生

李

簡字蒙齋信都人憲宗九年官泰安州判著學易記九卷兼採百家叅以己說為世所稱

趙州

南北朝魏

李

謚字永和平棘人少好學公府再辟不就覽考工記大戴禮盛德篇以明堂之制不同遂著

明堂制度論愛樂山水高尚之情久而彌固卒年三十二博士孔璠等上書詔曰謚守志冲素儒隱之操深可嘉美謚曰貞靜處士並表其閭

唐

啖

助

字叔佐趙州人淹該經術天寶末為丹陽主簿秩滿屏店甘足蔬糗善為春秋考三家短

長縫綻補闕號集傳凡十年乃成

李至遠

高邑人素元孫也治尚書左氏春秋撰周書起后稷至赧王為傳記令狐德棻許為良史

上元間制策高第高宗時歷天官侍郎弟從遠清密有學仲龍初歷太府卿兄弟德望相埒

明

魏柏祥

字元昌柏鄉人以恩貢入太學落第合獨與高邑趙南生善自京師歸營別墅曰柳莊

讀書其中以諸家傳註有未諧於經者著四書目錄又以朱子綱目有功春秋而其事或有未盡著讀史纂言年五十七卒

深州

南北朝魏

劉獻之

饒陽人少孤貧惟好詩傳曾受業於北海程元遂博觀衆籍人有從獻之學者輒告之曰

人之立身雖百行殊途準之四科要以德行為首若能入孝出弟忠信仁讓不待出戶天下自知倘不能然雖下帷針股躡屨從師止可博聞多識於立身之道又何益乎由是四方學者莫不高其行義而希造其門後舉孝廉至京稱疾而還

孫惠蔚

字叔炳武遂人世以儒學相傳太和初舉孝廉為中書博士叅定惟樂定七廟禮遷秘書

丞見典籍未周請令四門博士及在京儒生四十人叅考字義詔許之延昌二年封東強縣開國男

卒

齊

孫靈暉

武強人少明敏日誦數千言尋討族祖惠蔚手錄章疏不求師友三禮三傳皆通宗旨始

就鮑李詳熊安生質問疑滯其所發明熊鮑無以異也舉秀才射策高第天統初拜國子博士授南陽王綽經綽表為王師詔依所奏儒者榮之

定州

南北朝魏

張吾貴

字吳子中山人舉太學博士從縣銓受禮牛天祐受易祐銓粗為開發而吾貴覽讀一遍

便即別構戶牖聚徒十數講左氏義例多以新意參之學者奇焉

齊

張

周中山人博學通三傳高祖召為諸子講讀與張景仁同入華光殿讀春秋加國子祭酒待

詔文
林館

唐

杜

牽卿字少山曲陽人弼之子少好學博覽羣書以禮記春秋教授鄉里開皇初被徵入朝嘗採

月令觸類而廣為之書名玉燭寶典十二卷拜著作郎致仕兄子公瞻好學有家風

畿輔通志卷七十八

欽定四庫全書

史部

畿輔通志卷

七十九
八十

詳校官監察御史^臣劉人容

檢討^臣德生覆勘

總校官進士^臣繆琪

校對官中書^臣葉蘭

謄錄監生^臣鄧培善

欽定四庫全書

畿輔通志卷七十九

文翰

順天府

漢

鄭

炎

字文勝范陽人食其之後也有文才解音律言論給掾多服且能理靈帝時州郡辟命皆

不就嘗作詩二篇以見志有曰杞玉乘龍驥不逢樂與和安得孔仲尼為世陣四科後風病恍惚性

至孝母母憂病甚未幾卒年二十八

晉

盧

諶

字子諒涿人北依劉琨琨為司空以諶為主
薄甚重其才後石季龍以為侍中中書監諶

名家子早有聲譽為時所推雖顯於石氏恒以為
辱每謂諸子曰吾身沒之後但稱晉司空從事中
郎耳撰祭法註莊
子及文集行於世

南北朝梁

盧

廣

范陽涿人少明經有儒術天監中歸梁歷步
兵校尉兼國子祭酒編講經史言論清雅僕

射徐勉深相賞納後為
武陵王長史卒於官

魏

盧

觀

字伯舉范陽人少好學有雋才舉秀才射策甲科除太學博士孝昌初同李中雋王誦撰

定朝儀遷

儀曹郎卒

祖鴻勳

范陽人僕射臨淮王彧表薦其文學除奉朝請人怪其不謝鴻勳曰為國舉才臨淮之務

何事從而謝之彧喜曰吾得其人矣以尉正去官歸里齊神武徵作晉祠祀好事者翫其文位至高陽太守在官清素

妻子不免饑寒

李

廣

字弘基范陽人博涉羣書有才思以才學兼御史修國史南臺文奏多其詞也卒後畢義

雲集其文七卷魏收為之序

北齊

盧思道

字子行范陽人聰爽俊辨才學兼著僕射楊遵彥薦為員外散騎侍郎與朝士作文宣帝

挽歌魏收陽休之祖孝徵等各得一二首思道獨八首時稱八采盧郎

盧詢祖

范陽人文辭華瞻舉秀才撰破蠕蠕賀表俄頃成又作築長城賦為時所稱歷太子舍人

周

盧誕

本名恭祖范陽人博學有文才周文帝以誕儒宗學府為當世所推拜國子祭酒恭帝初

除秘書監

唐

盧彥卿

涿人有學撰後魏紀三十卷貞觀中官東宮學士

盧照隣

字昇之范陽人高宗時與王勃楊炯駱賓王以文章齊名天下號四傑照隣任新都尉病

去官居其茨山下買園數畝疏潁水周舍病既久與親屬訣自沉潁水

王適

幽州人初見陳子昂感遇詩乃請交於陳有集二十卷

張懷瓘

涿人與弟懷環俱有文學善草隸所著有藥石論六體論用筆十枝等篇行於世

賈島

字閻仙范陽人初為浮屠名無本韓愈教之為文章舉進士不第文宗時坐飛謗貶長江

主簿善書法得鍾張之奧為文澹然接踵陶謝死後韋莊奏請追贈進士及第

五代周

扈載

字仲熙北燕人少好學善屬文嘗遊相國寺見庭竹作碧鮮賦題其壁世宗聞之遣小黃

門就壁錄之覽而稱善
擢知詔誥遷翰林學士

宋

劉

載

字德興范陽人好學博通經史嘗作五論曰
為君為相為將去讒納諫文士稱之宋初為

工部侍郎受詔撰明憲皇后謚冊
文又作弔戰國賦萬餘言行於世

田

偉

燕人為江陵尉因家焉作傳古堂藏書五萬
七千卷無重複者黃魯直曰吾校中秘書及

遍遊江南文士圖書
之富未有過田氏者

馬

湘

順州人鄉進士種
學緝文有聲當世

遼

王鼎

字虛中涿州人博通經史時馬唐俊有文名適上已與鼎袂飲因索鼎賦詩鼎援筆立就唐俊

驚其敏妙清寧中成進士累官翰林學士當代典章多出其手

金

劉昂

字之昂興州人大定進士高曾而下七世登科昂天資警悟律賦自成一家作詩得晚唐體尤工絕句

王欝

字飛伯大興人為文閑肆奇古歌詩俊逸為李欽叔所稱天興初卒

梁斗南

良鄉人第進士官河南都運性頽悟讀書工詩有幹局時輩服其通敏

左光慶

蘇人好古讀書喜為詩善篆隸尤工大字几宮廟榜署經光慶書者人稱其有法平時為善言

蓄善藥稱善善道人

元

盧摯

涿州人仕至翰林學士博學有文思元初稱能詩者必以劉因盧摯為首所著有疎齋集

高克恭

字彥敬房山人官刑部尚書博學能文善畫寒林墨竹其筆法似米南宮人稱高房山

鮮于樞

字伯機漁陽人官至太常典簿能詩文尤精書翰所著有困學齋集虞集常云大德延祐

間翰墨在漁陽巴西兩地謂鮮于樞趙孟頫鄧文原也

何失

昌平人負才氣能詩文至正間名公交薦之以親老不就揭傒斯嘗推重之虞集見其所

作嘆曰當序而傳之使後之作者亦知世有斯人

明

李季鼎

大興人永樂初以國子生拜為左春坊贊善講經書深見禮待為人博學強記當時號為

書庫及致仕猶訪以時事宣德初以輔導功錄其子

顧大章

字天和通州人舉弘治乙卯鄉試性聰敏問學博瞻倜儻不羣善詩歌古文所作多不屬

草拔筆立就有小容集行世官至西府通判

頓

銳字叔養涿州人幼聰慧日誦數千言正德辛未成進士以詩名都下選高淳知縣遷代王

府長史去官歸築室於城之西懷玉山自號懷玉山人著書歌詩徜徉自得所著有鷗汀集漁嘯集

涿鹿先賢傳行於世

張

詩宛平人自號崑崙山人初學舉子業於呂柟繼學詩文於何景明聲名藉甚會順天府試

少尹令士人自負兒入塲詩即拂衣出絕意不應
舉作汗漫遊所至留題歸居一畝之宅隙地種竹
每遇風雨欣然命酌醉即跨蹇驢信所之興盡
而返為文雄奇變怪覽者不敢以今人目之

米萬鍾

字仲詔宛平人萬歷進士累官江西按察司
工榜書與華亭董其昌齊名當時稱南董北

米魏閭數遣人求萬鍾書翰卒不應閭恚嘆
倪文煥劾為黨人削籍崇禎初起太僕少卿

盧友竹

字居素三河人萬歷中舉鄉試任盧龍教諭
累遷奇嵐道副使傳學好讀書政事之餘手

不釋卷所著有彙倫法戒錄武庫
千秋鑑衡兵緒論及雜撰行於世

馬應乾

字健甫金吾衛指揮使永之子古樸開奕絕
去脂韋掌衛數年清苦不異寒士老而困甚

性嗜書尤精於天文歷算所為詩文
皆自成一家言著有釋典叢錄四卷

于奕正

初名繼魯字司直宛平人性孝友父歿讓財於兄弟自居荒園終日讀書工為詩歌好游

名山常言秋山嚴淨澹時如有道高人每於霜清木老時策蹇而往或攀枯藤坐危石慨然賦詩有超世之槩其所交往皆當世名人尤與楚譚元春劉侗友善嘗與侗著帝京景物畧崇禎己亥偕侗取道金陵徧歷名勝歸而疾作卒於旅舍所著金石志樓草詩與景物畧並行世

崔子忠

字道母順天府學生形容清古善於丹青規摹顧陸閻吳遺跡居京師閨閣中脩然一室

盎魚盆樹迥出塵表興到則解衣磅礴一妻二女從旁點染共相指示間出以貽雅故或用金帛購請掉頭勿顧也少師萊陽宋繼登與其子應亨致為同學應亨官吏部屬選人以千金為子忠壽子忠笑曰若念我貧不出橐中裝餉我而使受選人金應亨愧謝玫居諫垣數求画不應一日誘致

邸舍子忠不得已與画一幅出坐隣舍使童往取
画曰樹石簡畧尚須增潤致與之子忠卽碎画而
去史可法自皖撫家居偶過其舍晨炊不給解所
乘馬贈之可法徒步而歸子忠售馬得十數金呼
朋轟飲一日而盡曰此酒自史道隣來非盜泉也
生平好讀書尤深戴禮發為古文詩歌博奧奇崛
非近世所有甲申亂作
潛避委巷竟以饑死

孫孝本

字子烏宛平人少流落河間壯還鄉里以耕
織為業性尤嗜書其才婉密精緝長於纂述

尤好術數者有視易一編年七十
卒王伯俞題其所居曰逸人坊

本朝

孫承澤

大興人明崇禎進士入

本朝歷官吏部侍郎乞休藥退谷於西山老而好學壺
壺不倦於史事多所論述而有明一代典故尤瞭
如指掌至於博古精鑒一時圖書
之富比之宋田氏云卒祀鄉賢

康

莊通州人生而穎異幼有神童之稱弱冠舉順
治甲午鄉試兩任司鐸多所造就遷兵部主

事監督京倉任滿將擢以疾乞歸好學譚
文至老不倦生平著述甚富卒祀鄉賢

米漢雯

字紫來宛平人明太僕少卿萬鍾孫登順治
辛丑進士歷知長葛建昌二縣康熙十八年

試博學宏詞科授翰林院編修漢雯好學工
詩兼善小令書畫承其家法當時呼為小米

姜揚武

文安人博學多聞於書無所不讀著
有河源故一編言河道原委甚悉

楊雍

寶坻人學術深醇文體一準先正為後學模
楷康熙壬子舉鄉試第一己未成進士改庶

吉士授翰林院檢討纂修會典恪勤厥職生平以清白自天家無餘積卒之日幾不能殮康熙五十

年祀鄉賢

王

源

大興人流寓江淮從魏叔子治古文遊京師公卿皆降爵齒而與之交與四明萬斯同訂

明史稿兵志源所作也年四十後或勸應試舉康熙癸酉京兆第四人所評文章六宗行於世

朱

綸

通州人父歿家貧事母至孝康熙戊子以五經舉京兆試第一己丑成進士改庶吉士平

聖祖

召對乾清宮命校玉樞等書雍正二年祀鄉賢

永平府

南北朝魏

陽

尼

字景文無終人少好學博通羣籍與上谷侯天護頓邱李彪同志齊名拜著作郎累遷平

北府長史所造字釋數十篇未就而卒其從孫承慶撰為字統二十卷遂大行於世

韓秀

昌黎人仕魏為都尉聰敏才辨有文學累官青州刺史

隋

榮建緒

無終人性甚亮直兼有學業開皇初仕至始洪二州刺史著齊紀三千卷

金

王元粹

平州人為南陽酒官有詩名

明

盧耿麒

字仁淑樂亭人童子時過目成誦弱冠登進士尤博羣書著有藍山集耿麒篤於孝友室

產悉以讓弟所居庭前無旋馬地嘉靖中官山西副使建修五堡世廟褒之

本朝

穆維乾

山海衛人少嗜學博綜經史舉順治二年鄉試任保定府教授訓士有方用薦遷翰林院

典簿預修

太宗

文皇帝實錄

賜白金文

綺丁外艱歸屢徵不起在鄉立社講學遊其門者多所成就著述之勤老而彌篤臨終猶手不釋卷

康熙五十四

年入祀鄉賢

李成性

遷安人進士知山東新城縣撫綏綏邑未久告歸隱居山莊讀書嗜古耄年弗倦鄉人推

為理學
先型

保定府

南北朝宋

祖冲之

字文遠范陽道人稽古有巧思宋孝武使直
華林學省賜宅宇卑服初元嘉中用何承天

所製歷比古十一家為密冲之猶以為疎乃更造
新法上表言之孝武令善歷者難之不能屈者易
老莊義釋論語孝經注九章造
綴述數十篇官至長水校尉

祖暅之

字景爍巧思入神父冲之所改何承天歷時
尚未行暅之更修之於是始行焉位至太府

卿

魏

祖

瑩

字元珍范陽道人年八歲能誦詩書呼聖小兒及長好屬文與陳郡袁翻齊名時人語曰

京師楚楚盧與祖洛中翩翩
祖與袁瑩累官車騎大將軍

隋

祖君彥

范陽人北齊尚書僕射挺子有才學大業末為東平郡書佐郡陷於翟讓因為李密所得

密甚禮之署為記室凡
軍事羽檄皆出其手

唐

耿

偉

本河東人徙居東鹿善詩與錢起等齊名稱大雋十才子官終左拾遺

元

楊果

字正卿祁州蒲陰人金大定中進士入元累遷北京宣撫使拜叅知政事果性明敏美丰

姿工文章尤長於樂府有西庵集行世卒謚文憲

苟正甫

清苑人弱冠從郝經使宋被留真州經授以學遂以文名詩文書畫有晉唐風致仕至國

子祭酒

郝天挺

安肅人英爽剛直歷官中書左丞多所論建嘗註唐詩鼓吹又修雲貴錄子祐官御史

董珪

字君章祁州人幼讀書日記數千言父母未之奇也一日隨父見道傍古碑父使視之一

覽悉記父大驚乃命詣名師受業後登至治辛酉狀元歷知潁州事

明

武或

保定人少有逸才洪武時徵博洽多聞有司以其名上召為侍讀太宗在藩邸常與講解

經史及即位徵至京師授侍讀學士未幾告歸賜之敕曰博通六藝貫徹五經允儒林之碩望誠國家之著龜

劉止

字至善清苑人天資穎悟潛心好學善詩文由貢生為教職楊忠愍公繼盛受業其門所

著有檢齋集

劉乾

字仲坤唐縣人好讀古書為文有秦漢氣議論英發喜談兵事登嘉靖進士授知縣改教

授所著有易庵初藁灘上集

劉堯卿

清苑人嘉靖進士累官浙江叅政敏悟過人讀書破萬卷大筆華瞻邑令延修縣志或請

求古冊考遺事堯卿曰止須毫楮耳奚藉書為當時服其淹博

宋大儒

字道行清苑人嘉靖時舉人事親孝博學善屬文修縣志言約事設名與劉堯卿埒累官

府同知卒

王荔

字子岩高陽人有詩名嘉靖中舉鄉試司李青州不阿上官意上官惡之作詩以自白直

指有所索亦以詩答之數年投劾歸為萬水亭與其弟日相倡和里中人指其宅曰詩王家

邵炳

安州人好學博覽由貢生歷官教授年八十有二猶日勤誦讀手自編摩著有賢哲品彙

名臣筆化上谷安州人物志聲律啓蒙淑世格言及詩文存稿諸集

邢雲路

字子登安肅人萬歷進士歷官陝西副使生有異慧博極羣書尤究心天官家言著古今

歷律考七十二卷臨終謂其子曰四十年苦心十一朝鉅典可當茂林遺書其善藏之

鄭棻

字思衆安肅人襄敏公洛第四子有俊才中萬歷丁酉科經魁讀書卓犖詞賦藻妍所在

人多傳誦

劉昌祚

字延熙清苑人按察使不盈子幼穎悟年十六補邑弟子員慨然曰八股頭歎門瓦子也

遂奔去沉酣古籍寒暑無間闢一室督子弟誦習之積書萬餘卷郡邑有大典禮就討故實焉

王承芳

字繼美清苑人父登三太僕寺卿承芳雖貴公子恂恂雅飭無紕綳習讀書無間寒暑博

學善屬文尤長於詩有邁亭存稿四集

任天民

字拙齋定州人好讀書凡所涉覽口能枚舉事親孝親歿屏寢室者三載妻死不更娶由

貢生任靈寶教諭勢豪侵學宮基力爭不得乃乞歸輯縣志三卷

李鳳翔

字伯鳳東鹿人為諸生數奇不遇力學四十年博覽羣書尤邃心資治通鑑性理大全二

書者有四詩
釋義日新集

劉汝教

唐縣人號育山樵子幼機穎長益苦心於文自謂擴撫兩漢剖剗先秦以成吾之磊落而

後已七試七黜嘆曰非文之厄實運之塞也
晚嗜莊騷日事詩酒所著有育樵吟五卷

張居

字如磐清苑人少有文譽明末由進士官翰林檢討甲申後築室山中杜門著書人有謁

遺拒不受自為墓誌一通鏤而卷之客有訪者輒以一卷貽曰已作古人其曠介如此高隱三十年

卒年八十有二

本朝

范士楫

字箕生定興人前明進士順治初起禮部郎改吏部郎博學能文尤嫻於詩著有范陽志

畧匪棘堂集各若干卷行世

郭棻

字快圃清苑人順治士辰進士改庶吉士降按察僉事累遷翰林院侍讀博學工文詞華

豐瞻常總修
畿輔通志著

皇畿

大一統賦累數萬言士林傳誦同時分修通志者進士則安肅師若瑋容城李徵瑞舉人則新安魏

一鰲清苑郭焚雄縣馬之驢拔貢生則安州房循
獲諸生則清苑劉可書王胤高陽李瑄亦俱有文

名

王

儀

清苑人性敏善
屬文常分輯

畿輔

通志其為詩學韋孟書法出入蘇董而矯以清健
一時得其尺幅者不啻拱壁為諸生久次貢候補

訓導以子貴 封內

閣中書卒祀鄉賢

高

鑄

字薦馨清苑人為郡諸生嗜古善書得襄陽
筆法好遊山水所至有題咏自書自鐫於峽

壁間著述甚富詩有陸舟蘆中依雪
浮家四集雜者又有義烈金蘭等編

潘

鳳

字月臺慶都人邑庠生立身端方言笑不苟
孝行素著讀書專務窮理所著有四書大觀

詩經體註

等書行世

陳

緯

唐縣人舉康熙壬子鄉試授內閣中書掌典
藉事緯敏悟過人究心經史著有四書寶筏

八卷禮記集要三十卷兼工詩古文
詞有岳麓堂全集若干卷卒祀鄉賢

郭

濬

雄縣人少通敏長益嗜學於書無所不讀下
筆輒數千言以貢生任薊州學正康熙二十

一年

駕幸薊州

召見講尚書洪範篇奏對稱

旨邀
賜宸翰

士林榮之

王

忻

雄縣人御史孫蕃之子幼事父母以孝聞九
歲讀尚書即通曉大義長而博覽經史肆力

於詩古文詞下筆數千言立就嘗遊金陵結廬江
澗者三十餘年守令訪之槩却不見或以詩文相
正輒談論竟日罔有倦容後歸里門
從遊者益衆康熙四十七年祀鄉賢

陳鶴齡

字鳴九安州人儒學淵之子潛心理學涵養粹然尤工於文著作皆根理要舉康熙甲子

鄉試選授正定縣教諭倣胡文定公法舉行條約躬行為諸生先遠近之士來學者數百人潯沲泛溢嘗奉檄視沿河水災同事者欲以不成災報鶴齡獨力陳百姓疾苦狀太守為之動容蒙賑恤全活者數千家陞順天府武學教授卒於官數郡之士皆來會葬學者稱懿長先生子惠華登雍正甲辰一甲第一名惠榮惠正俱進士

河間府

漢

張

超

字子並河間鄭人良之後有文才靈帝時為朱偶別部司馬著賦頌等十九篇又善於草

書妙絕時人
世共傳之

南北朝魏

封

懿字處德渤海蔭人雋偉有才氣能屬文仕魏為給事黃門侍郎著燕書行世

邢子才

本名邵河間鄭人十歲能屬文聰明強記日誦萬餘言魏自孝明之後文雅大盛子才獨

步當時每一文出京師為之紙貴初與濟陰溫子昇齊名世謂之溫邢後與鉅鹿魏收亦稱邢魏子才累官國子祭酒授特進卒

周

黎景熙

字季明河間鄭人從祖廣精字義楷景熙傳習之有書千餘卷雖窮居獨處不以饑寒

易操周文徵之入關令正定古今文字勤於所職
保定三年大旱方盛營宮室景熙上封事力諫上
嘉納之仕終
儀同三司

隋

劉善經

河間人歷著作佐郎太子舍人著
酬德傳諸劉譜四聲指歸行世

唐

尹元凱

樂壽人為慈州參軍免歸棲遲三十年詔起
右補闕時天下文章相尚徐庾體元凱與武

功富嘉謨新安吳少微原本
經術雅健過人士爭慕之

劉長卿

字文房河間人間元二十一年進士
官至隨州刺史有詩集十卷行於世

宋

張

昭

河間人十歲誦書數千萬言及長博涉經史太祖時拜吏部尚書嶺南平遣使就卧疾處

問獻俘禮昭乃口占以對並有證據當時服其該洽

金

麻九疇

字知幾莫州人七歲能草書作數尺大字有神童之目南渡後讀書北陽山下正大三年

公卿交薦可試館職賜及第授太祝應奉翰林文字

元

李京

河間人任烏撒烏蒙宣尉使嘗為雲南志及鳩窠集學士虞集元明善為序

劉

遵

河間人有異才為詩文多不經人道語遊京師無知者作採蔥詞以見元明善大驚曰他

日當避此位中丞張養浩亦善之為延譽由是知名授濟南學錄未至卒

明

李

溥

字文博任邱人生而神慧稍長能課學不煩指諭舉宣德八年會試乙榜司訓巴陵累遷

泰安州學正解官歸溥善為古文尤精於象緯星歷諸書人比之李淳風

本朝

蘇騰鳳

字爰止寧津人順治丁亥進士授陝西石泉知縣蒞任數日即告歸構精廬一區讀書其

中因博覽羣籍尤善為詩暇則邀知己尊酒論文終身不入城市卒祀鄉賢

天津府

漢

雅琴趙氏

名定渤海人宣帝時丞相魏相奏雅琴趙氏七篇見漢書藝文志

三國魏

王

修字叔治南皮人魏武過修家穀不滿十斛藏書數百卷嘆曰士不妄有名乃辟魏郡守

北齊

楊元懿

南皮人與州里李鉉河間宗惠振等結友甚有文譽

明

馬

政字公敬青縣人性穎悟博學能文登進士任翰林院檢討歷遷興岷楚三府長史善為詩

有魏晉風韻見人過輒面斥之終以峭直忤權貴罷歸終日吟咏尋疾卒

本朝

湯

淳

南皮人幼奇穎有神童之目登順治辛丑進士家居不仕以著書為業精於藻鑑嘗僑寓

武陵遠近就業者無虛日其所甄拔後皆成巨卿迨遊括蒼與學使徐郡守項郡丞姚邑令王憲副唐侍御方論文賦詩為忘形交號括蒼七友康熙五十五年祀鄉賢

正定府

漢

王

禹

常山人成帝時為謁者世受河間樂能說其義弟子宋曷等上書言之班固藝文志樂義

有王禹記

二十四篇

南北朝魏

魏季景

下曲陽人博學有文才莊帝時歷官大司農有文筆二百餘篇

北齊

魏收

字伯起下曲陽人文宣受禪詔冊諸文及魏史皆收所撰官至尚書右僕射

隋

魏澹

字彥深下曲陽人專精好學博涉經史任著作郎高祖以魏收所撰書褒貶失實命澹別

成魏史澹所著甚簡要高祖善之

唐

崔行功

鹿泉人少好學唐儉愛其才妻以女初太宗命魏徵寫四部羣書將藏內府功久不就至

高宗時命行功與趙仁本等相次檢校行功累遷蘭臺侍郎

蘇味道

樂城人九歲能屬辭與里人李嶠俱以文翰顯時號蘇李舉進士裴居道為金吾將軍倩

味道作章攬筆而具當時感傳延載中同鳳閣平章事

李觀

字元實贊皇人貞元中舉進士宏辭授校書郎屬文不傍前人時謂與韓愈相上下

五代晉

賈

緯

獲鹿人長於史學

念唐自武宗以後史官職廢無實錄乃採次傳聞為唐年補錄六十五

卷晉天福中為史館修撰與修唐書

元

李

冶

字仁卿藥城人金進士亂後流落忻寧間聚書環堵處之裕如也元世祖即位聘為學士

期月以老疾辭所著書百數十卷行世

蘇昌齡

本名大年以字行真定人為詩文尚氣不喜衰頹有江海襟懷竹石師東坡松木學廉宣

仲畫家宗之元末官翰林院編修後僑寓揚州入張士誠幕先吳亡而卒

明

趙民望

藁城人洪武初舉儒士因病遣歸後特勅徵之曰朕惟才疎以致賢隱善匿民未康世未

泰爾卿可杖策來朝與朕同遊至拜四輔官兼太子賓客與杜穀等侍左右講論治道以老致仕

毛

玉

字良器元氏人正統戊辰進士累官吏科給事中資性明敏器度洒然為文清婉有致尤

長於詩在吏科一時章奏皆出其手

本朝

馬逢伯

字仲甫藁城人少孤性至孝奉母趙氏色養備至幼與左先斗馬士奇諸君子遊以詩文

唱和居恒讀書嗜古嘗夜分微僦以刀刺股至血流不自知也由乙酉貢監為博平令年七十卒門

人私謚清介先生

順德府

漢

侯 芭

鉅鹿人楊雄弟子受太元法言雄卒為起墳喪之三年今縣東二十五里有故居址

隋

李孝貞

字元操栢人人好學能屬文射策甲科拜給事中以討尉廻功授上儀同著文集二十卷

元

劉德淵

字道濟內邱人生而貌古刻苦好學中統間三府累辟不就嘗著書數萬言數析司馬先

通鑑數百條悉與朱子綱目合許衡雅敬之

明

王鼎

字器重鉅鹿人幼穎慧甫齠齔禮儀先達器之及長好學能文時譽寢起舉進士官評

事布袍蔬食淡如也常謂人曰慎勿妄語此口一妄起羞何限澧陽周偉稱其學術純正焉

高大經

任縣人為諸生擅文譽名噪諸郡及登第同榜咸推重之授歷城令尋以疾卒所著有傳

習錄并詩

集行世

撤大經

字宇道廣宗人少聰穎日記數千言篤志好學領正德丁卯鄉薦生平著述甚富大學士

李東陽見其文曰此海內人豪也年三十二卒士大夫惜之

高瓚

字大用邢臺人少貧好讀書常走百里外借友人書抄誦之以歲貢授樂陵訓導日聚諸

生講解經史遷大同諭乞歸惟
以教誨著述為事至老不倦

本朝

徐養元

唐山人明末進士入

本朝累官湖廣提學副使歸嗜學著書誘獎後進負笈
從遊者不遠千里門下士多所成就有四書集說

行世卒
祀鄉賢

廣平府

周

荀卿

名况趙人年五十遊學於齊齊襄王時卿
最為老師適楚為蘭陵令著書數萬言

漢

膠

倉

趙人武帝時
待詔金馬門

周

福

字仲進甘陵人初桓帝為蠡吾侯
受學於福及即位擢福為尚書

三國魏

劉

劭

字孔才邯鄲人黃初中為散騎侍郎受詔集
五經羣書作皇覽拜騎都尉定律令嘗作趙

都賦明帝美之詔并賦許洛二都凡所撰
述法論人物志之類百餘篇卒贈光祿勳

南北朝魏

宋道璠

列人人少而敏雋世宗初以才學被召與孫
惠蔚典校羣書考正同異自太學博士轉京

兆王愉法
曹行參軍

宋季儒
道璵從子起家太學博士當至譙宋之間為文弔檣康甚有理致早卒士論惜之

北齊

荀士遜
廣平人好學有思理為文清典武定末舉司馬秀才皇建中累遷中書舍人以文辭見用

號為稱職與李若
等撰典言行於世

宋孝王
廣平人有文學與劉善經輩待詔文林館時稱入館諸人皆不逮孝王云

唐

宋廷芬
清河人世以儒聞廷芬能辭章德宗時教習藝館內賜第一區加穀帛

司空曙

字文初廣平人大厯進士與盧綸等號十才子天性冲澹詩如其人官終虞部郎中

劉言史

邯鄲人以詩歌知名李夷簡節度漢南辟為從事卒於襄陽

張祐

字承吉清河人家世仕顯稱張公子性高曠工詩遊江南僑居曲阿令狐楚鎮天平表薦

之以詩三百篇進為元稹所阻失意東歸晚宦南海太和卒

張愔

字象文清河人乾寧進士有詩名王建僭蜀授膳部郎王衍愛其詩甚見推重將召知詔

詰為宋光嗣所譖乃止

宋

范杲

字師回宗成人質從子少孤刻志於學為文尚深僻初為太廟齋郎以文謁陶穀實儀咸

大稱賞官終諫議大夫子坦進士

李

淑

字獻臣邯鄲人積書四世約三萬六千二百餘卷比於東觀開元之富淑博洽習朝廷典

故凡所撰制誥為世所稱

金

王

礪

字逸賓臨洺人博學能文不就科舉家無甌石未嘗介意明昌中以馬惠迪薦為鹿邑主

簿未幾乞歸其詩為明昌詞人雅制中七人之一

王

或

字子文永年人承安進士為尚書省掾與郎不合棄官去往來登封山間改名知非字無

咎文工駢體詩亦清雅正大中宗室思烈行臺洛陽聘為叅議城陷不知所終

元

元明善

字復初清河人弱冠工文章為建康學正仁宗即位遷翰林直學士詔節尚書經史譯之

以進每奏一篇帝必稱善累官湖廣行省參政至治二年卒謚文敏明善蚤以文章自豪出入秦漢

間晚益精詣有文集行世

劉賡

字熙載洺水人肅之孫少有文名至元間用薦授國史院編修累遷翰林學士兼國子祭

酒大歷初卒賡久典文翰當時大制作多出其手以耆年宿德為朝廷所推重云

明

連

鑛

字伯金永年人性豪邁與人不輕合事父母孝敬讀書好古詩文為當世所推書法端勁

如其為人所著明山疏畧燕山漫稿由進士累官總督河道都御史著有政績

本朝

申涵光

字鳧盟永年人佳廕長子博學能文尤長於詩弱冠名噪三輔甲申聞父殉難慟不欲生

後遂絕意仕進日事詩文晚年名益重與殷岳張益稱畿南三才子有文集四卷聰山詩八卷及荆園小語等書行世弟涵盼順治辛丑進士官翰林院檢討亦以文學有聲館閣間兄弟並祀鄉賢

殷岳

字宗山雞澤舉人父太白崇禎時官陝西副使忤楊嗣昌坐法死獄中岳上疏為父乞骸

骨比歸而京師已陷遂入西山與其弟淵謀舉義事洩淵被害岳匿申涵先家得免順治初吏部按舊籍選人除岳知睢寧縣抵任未幾涵光勸之歸岳慨然曰吾豈以一官易我友哉遂投劾還里與

涵光晨夕唱和相樂也岳為詩自魏晉下屏不觀
尤不喜律詩故所作惟五言古風一體莽莽然肖
其為人後
客死福州

李芳莎

字臺辰永年人以拔貢知武鄉縣有惠政遷
柳州同知未赴乞歸芳莎性質實好讀書寢

食於
涯際
詩格沉雄得少陵氣骨

大名府

晉

成公簡

字宗舒東郡人潛心道味默識過人張茂先
每言簡清靜比楊子雲默識比張安世累官

散騎
常侍

南北朝魏

李

邕

字修穆，頓丘人。侍中平之子。幼而雋異，有逸才。任著作郎，詞藻之美，為時所稱。卒，贈洛州

刺史

李

彪

字道固，頓丘人。孝文初，為秘書丞，領著作事。先是，崔浩高允著述國書，依春秋體遺落時事，彪請從遷固體，詔從之。遷散騎常侍，卒。所著詩賦章表別有集。

唐

張文收

昌樂人。大理卿文瓘從弟，善音律，著新樂書數十篇。官終太子率更令。

宋

宋

白

字太素大名人善屬文乾德初獻文百軸試高等授著作郎雍熙中與李沆纂文苑英華

一千卷三知貢舉得人稱盛累進吏部尚書卒謚文安白聚書數萬卷當類故事千餘門號建章集

劉師道

東明人雍熙進士累遷樞密直學士性慷慨尚氣善談世務工於詩與楊億輩酬倡當時

之稱

金

王汝梅

字大用大名人始由律學為伊陽簿秩滿遂不仕性嗜書動有禮法生徒就業者兼授以

經學同學或憫其貧時周之皆謝不受

明

穆文熙

東明人嘉靖進士少穎悟經籍無所不覽惟氣節給事中石以直言被廷杖文熙周旋醫

藥得不死士論高之累官按察副使歸築逍遙園坐起一編文藻蔚然所著有道遙集尤史戰國纂

評諸書
行世

晁

璠

字君石開州人嘉靖進士累官國子監司業性行端雅文藻雄俊為館閣所重子東吳字

叔泰弱冠登進士改庶吉士亦有文名尤善摹古書法父子濟美士林榮之

宣化府

南北朝魏

燕崇

廣寧人幼聰悟言動必由禮弱冠益游心經術神龜四年詔聘文學之士崇應詔出授國

子博士崇以管世士人縱恣長酣以為
高達作士鑒以訓之仕終河內太守

金

王元節

字子元弘州人幼穎悟渾源劉撫愛其才以
女妻之遂傳其賦學登天德三年詞賦進士

授密州觀察判官乞歸道遠鄉里號曰遊齋有詩
集行世弟元德亦弟進士有能名孫國綱字正之
業儒術宣宗時
官監察御史

本朝

李暄亨

字麗生蔚州人性至孝父歿哀毀骨立既葬
廬於墓側祥禪後作九間詩以寫悲慕覽者

皆為流涕登康熙甲戌進士官庶吉士終內閣中
書暄亨學術醇正根柢先儒發為詩文力追正始

魏果敏象樞見其文嘆曰此一代之雋也所著有趨庭日記圖南航澄園詩槐省雜記若干卷卒祀鄉賢

易州

金

魏道明

字元道易縣人兄弟四人皆登進士能詩道明最知名仕至安國軍節度使暮年居雷溪

自號雷溪子有鼎新詩話行於世

任詢

字君謨易州人慷慨多大節書為當時第一畫亦入妙品登正隆二年進士歷北京鹽使

張廷玉

易州人善詩其友邢進之以題百種授之曰能一日為之乎廷玉揮翰不停日中已就承

明

宋登春

字應元新河人性豪宕每酒後放言非秦漢不為文非李杜不為詩年三十闔室盡喪乃

涉易水入太行閉閣讀書者十年已而歷晉魏經秦蜀過閩粵溯沅湘下江陵居大鵞池因號鵞池生復順流而東登泰山觀渤海至鄒嶧又潛學者數年由是詩文益進萬歷五年遂鄉里拜邱壠邑令結廬以處之踰年復之江南寓雲間徐宗伯家一日謂宗伯曰可為我具一舟我將觀海宗伯如其言遂乘舟而去不知所終所著有燕石文集布衣詩集清平唱和詩行世

本朝

賈

穆

南宮人性至孝事繼母能得其歡心讀書好學凡經史子集莫不編摩成帙行文規倣歐

曾詩歌兼擅唐宋以歲貢司訓房山甫至卽製詩
祭賈島墓比歸年已耄耄猶與邑子弟論文不輟
所著有樊桐山樵文稿瘦仙稿
人詩稿康熙五十九年祀鄉賢

趙州

漢

吾丘壽王

字子願趙人從董仲舒受春秋高才通明
徵為光祿大夫汾陰得寶鼎羣臣皆賀以

為周鼎壽王獨曰天祚有德寶
鼎自出乃漢寶非周寶上善之

南北朝魏

李公緒

字穆叔平棘人魏末為冀州司馬屬疾去官
沈冥樂道雅好著書撰興言禮質儀古今記

畧元子趙記趙語
等書並行於世

唐

李陽永

字少溫趙郡人以詞翰名乾元間為縉雲令值歲旱禱城隍與神約不雨即焚廟及期而

雨自為文記之後遷
當塗令篆書尤著

李

建

字杓直趙郡人貞元中補校書郎德宗思得文學者或以建聞擢翰林學士順宗立與王

叔文不合左遷後拜刑部侍郎初建為學時
家貧苦後雖貴顯未嘗置垣屋以清儉稱

宋

李之儀

趙州人善屬文尤工尺牘仕為樞密編修官罷歸寓穎昌代范純仁作遺表帝見之悲愴

不已之儀自號姑溪
老農有文集六十卷

元

張

翥

字仲舉寧晉人學文於李存學詩於仇遠至
元末以薦授國子助教累遷翰林承旨卒翥

以詩文鳴世而文不如詩近體長短句尤
工亂後藁多散失所存唯蛻菴樂府三卷

明

馮時化

字與川栢鄉人博涉經史為詩文馳蕩不羈
有人倫鑒趙南星為童子時時化見其文曰

此他日名臣也遂以女妻之性嗜酒常作
夢遊無懷山記復始摭諸書為酒史八篇

魏大成

字時夫栢鄉人年十五補諸生名駸駸起試
於大比者七數奇不售遂屏棄舉業杜門著

書賓朋希覲其面常著養生弗
佛二論一時傳誦年七十五卒

深州

漢

崔

駟

字亭伯安平人博學有偉才與班固傳毅齊
名肅宗修古禮巡狩方岳駟上四巡頌詞甚
典美帝謂竇憲曰卿知崔駟乎對曰班固數為臣
說之而未見也帝曰卿愛班固而忽崔駟此葉公
之好龍也憲因辟駟為主簿憲驕恣駟數
諫之憲不能容出為長岑令不之官而歸

晉

張

載

字孟陽安平人博學有文章太康初至蜀省
父著劔閣銘益州刺史上其文帝命鐫之於

劔閣山是知名起家著作郎累拜中書侍郎告歸

張

協

字景陽載弟少有雋才與載齊名辟公府掾歷遷河間內史於時所在冠盜協遂屏居草

澤以吟咏自娛擬諸文士作七命世以爲工弟元字季陽亦能文時號三張

南北朝魏

崔孝芬

字恭梓安平人早有才識高祖召見除著作佐郎歷官吏部尚書孝芬博文口辨商確古

今聽者忘疲所著文章數十篇

隋

孫萬壽

字仙期武強人年十四就能安生受五經兼博涉子史善屬文高祖時拜大理司直有集

十卷
行世

崔

頤

字祖濬安平人七歲能屬文開皇初射策高第與諸儒定禮樂授校書郎居母憂水漿不

入口者五日後奉詔與諸儒撰區宇圖志

唐

李百藥

字重規隋內史令德林子七歲能屬文父友讀徐陵文有刈瑯邪之稻句嘆不得其事百

藥進曰春秋瑤子籍稻杜預謂在瑯邪客大驚號奇童貞觀中累遷宗正卿卒百藥名臣子翰藻沉鬱詩尤其所長樵厠皆能諷之所撰北齊書行於世

張

鷟

字文成陸澤人早慧絕倫為兒時夢紫文大鳥五色成文止於庭大父曰吾聞五色赤文

鳳也紫文鷺也若殆以文章瑞朝廷乎遂以命名
調露初登進士第一人稱其文如青銅錢萬選萬中
號青錢學士官
終司門員外郎

宋

李宗誦

字大辨饒陽人司空昉子補太廟齋郎謁吏
部銓遷光範意其年少未能屬辭語之曰苟
援筆成六韻詩雖不試書判可入等矣宗誦賦詩
立就遂擬秘書省正字明日權國子監丞雍熙初

累遷比

部郎中

李宗諤

字昌武宗誦第七歲能屬文第進士累官翰林
學士當著翰林雜記以紀國朝制度上之

宗諤究心典禮凡制創損益靡不與
聞曉音律工隸書有文集六十卷

本朝

趙雲孫

字瑤草深州人善楷書垂髫入泮名噪士林嗜古好奇旁通奇門六士及天文律歷等書

當語人武侯木牛流馬亦人所能為但欠工夫耳及見觀星臺渾天儀別為積算一法簡而能精卒

祀鄉賢

張蜚英

字名儒深州人廩膳生篤學好善疊疊不倦所著有四書杞園講義及禹貢質疑二冊皆

詳明可傳
卒祀鄉賢

呂維垣

字子師深州人年十七為諸生試必冠軍篤志勤學問與同人語及有年少取巍科輒指

為不幸著有易經訂正註解及詩文傳記等篇卒祀鄉賢

定州

隋

李文博

博陵人性貞介鯁直開皇中直秘書內省典校羣籍不妄通賓客恒以禮法自處文博本

為經學後讀史書於諸子尤所該洽性長議論善屬文為薛道衡所稱

唐

劉禹錫

字夢得中山人工文章登博學宏詞科為監察御史累遷蘇州刺史以政最賜金紫服遷

太子賓客善詩晚節尤精

宋

王安中

字履道曲陽人進士第宣和中累官翰林學士為文豐潤敏拔所著有初察集七十六卷

畿輔通志卷七十九

欽定四庫全書

畿輔通志卷八十

卓行

順天府

漢

韓

福

涿郡人元鳳元年三月賜郡所選有行義者涿郡韓福等五人帛人五十疋遣歸詔曰朕

聞勞以官職之事其務脩孝弟以教鄉里令郡縣常以正月賜羊酒

北齊

鮮于文宗

漁陽人年七歲父以種芋時亡明年芋時對芋鳴咽如此終身

元

劉器之

良鄉人五世同居英宗臨其家詔旌之

曾

德

漁陽人宗聖喬母亡父仲祥再娶左氏攜家襄陽兵亂與左氏相失德徧求之五年乃得

於廣海間奉迎以歸孝養甚至

田善甫

寶坻人家貧孝養不怠親出乘驢扶掖不離側終身不渝至正間旌其閭

哈都齊

大都回安州人母疾醫不效割左脇取肉作羹進母數日愈

宋杞

一作宗杞大都人年十九父歿哀極成疾伏榻猶哭不止淚盡繼之以血既葬作遺書囑

妻楊氏曰善守志
以事吾母遂卒

明

張

拾

遵化人幼孤力作養母元末召隸戎籍晨起必拜母而後赴伍暮歸亦如之母病目旦夕

籲天母目復明洪武中詔旌之蠲其役

顧仲禮

保定人幼孤事母孝洪武中蝗起仲禮行田間泣曰食吾苗何以養母俄疾風吹蝗去母

沒仲禮年已六十廬墓三載

楊小兒

永清人性至孝母疾小兒剗肪下肉一片妻周氏亦剗臂肉煎湯以進母病得痊洪武中

旌表

張法保

大興人永樂中為金吾衛總旗祖母病剗股煮汁以進獲痊後復病剗臂肉療之亦愈擢

尚寶

丞

趙昇

永清人母病昇虔禱於佛剗臂肉令妻韓氏煎湯療母永樂中旌表

劉懷義

大興人性醇謹事親以孝聞正統中旌表

侯顯

昌平人為諸生母喪廬墓虎狼遠跡正統中旌表

谷大用

薊州人正統時監生祭酒李時勉忤太監王振枷於國子監門三日不釋時炎暑蒸鬱時

勉病不能勝大用憤激以隻名具疏請以身代疏入得並釋大用素樸魯不為六館所知及是名動

京師官至

戶部主事

韓定

字世安錦衣衛籍天順時曾欽反定避難民家有霍千戶者適與俱後霍為仇誣擬辟臨

刑指定以辯定不以大案為怯力爭之霍遂得釋定官至鴻臚寺卿

龔然勝

宛平人性至孝事親存沒盡禮天順間旌表

萬盛

大興人舉於鄉父母歿並盧墓三年有靈芝馴鹿之異成化中旌表

方榮

大興人神機營都指揮僉事母喪盧墓每旦詣營閱操畢即負土培塚有羣鳥翔集其樹

成化中

旌表

柳芳

武清人母歿自營塚壙盧其旁白鶴來巢所藝麥一莖兩穗服除復留三載成化中旌表

周尚文

東安人父目瞽以舌舐之復明後為樂昌訓導母喪歸葬廬於墓盜不敢犯成化中旌表

秦貴

霸州人自貴以上七世同居成化中旌表

李琚

密雲人自琚以上六世同居弘治中旌表

韓鵬

定邊衛人自鵬以上六世同居弘治中旌表

錢福

大興人父喪廬墓有烏鵲白鳩之瑞弘治中旌表

王原

文安人父珣正德中困於里役棄家去不知所往時原方在襁褓及長仰天泣曰人而無

父何以生為泣與母別尋其父厯齊魯間數年偶宿土神祠夢僧與語曰如來真個來好去還須去

原驚寤遇老人為占之曰當南行求之寺中原如其言行至輝縣之帶山有寺曰夢覺大雪宿寺門

下僧憐而詢其所自因呼寺中供炊者與敘鄉里則其父也相持哭迎之歸詔旌其門父子皆享年

八十餘子孫咸
甚科目不絕

郝

勲

字孟立涿州人舉嘉靖丁酉鄉試以母老躬耕奉養不赴銓選及母歿廬墓三年不至私

室脩族譜立譜訓以教親遜族人化之共費者不析各費者復合同居至二百餘口一時稱為義門

張

坤

永清人嘉靖中父麒被誣死於戌坤幼甚痛父冤每與弟訥相對泣及長母沒遂棄家觸

冒烟瘴卒尋父骸有負以歸與母合葬焉

李

彪

大興人善事父母鄉黨以孝稱隆慶中旌表

吳端御

字宜僕宛平人事親孝母病冬月思甘蔗日夜涕泣求之忽於山谷中得蔗數本奉母遂

愈人以為孝感所著有織絢堂集

余之祥

字鳳梧宛平人父仕彰德教授歸里雅慕山遊祥備肩輿飭具竭力以娛父心兄亡躬親

殯斂時學使校士漁陽已及期親友促之去不聽事畢始赴以兄喪過勞感暑疾卒所學甚邃著有

四書宗旨要言義經
統旨範經宗旨等書

裴成錦

永清人幼孤不識父面聞母言輒涕泣歲時伏臘必詣父墓哭奠母沒亦如之終其身

賈懋

永清人天性純孝晨昏定省必跪飲食必親奉以進父染疫母患瘡家貧懋竭力醫藥朝

夕籲天求代
親俱獲痊

崔光業

香河人父疾嚙指待於神額減已算以益父歿廬墓三年崇禎中旌表

劉緋

永清人崇禎丙子城陷父被執緋哀懇求以身代敵感其誠俱捨之

王政行

字次泉昌平州人崇禎中官守備里居甲申三月莊烈帝后既殉社稷梓宮暴露偽符下

州令葬時州皆偽官庫藏如洗政行與署吏目省祭官趙一桂及監生白紳庠生孫繁祉義士劉汝朴王汝朴徐魁李某鄧科趙永健劉應元楊道等十人各傾資產得錢三百五十千啓田妃壙宮奉安帝后以妃櫛為帝櫛出募西山口居氏擔筐昇土築塚修垣復率鄉耆奠祭悲號聲震陵谷

本朝

王公擢

通州人順治乙酉舉人性至孝竭力盡養親_亡哀毀備禮友愛幼弟終身不析產後授司

理未就而卒祀鄉賢

劉克家

保定人順治丙戌進士授中書舍人累官廣東僉事告歸性孝友事親愛敬兼至喪葬盡

誠兄貧為之置產瞻養弟早亡擇嗣令成立一時咸稱其義邑以隄決被水民人絕食多方賑助鄉

里德之

祀鄉賢

魏繼雲

通州人順治戊子舉人性孝友事繼母克盡子職待異母弟友愛尤篤官吳橋教諭擢永

豐令有惠政尋陞北勝州牧未任而卒永豐人謂己為本邑城隍云祀鄉賢

李舍春

通州人順治戊戌進士歷官鴻臚卿事親孝居喪盡禮祖母愛季叔以己產讓焉季叔病

歿宣府一門六喪經紀殯葬撫其遺孤迄有成立教後進先禮樂而後文藝士林翕然宗之祀鄉賢

田大祿

通州人性友愛兄弟亡遺子女撫若己出順治初年飢出米十石以賑復施棺以斂疫死

者遠近有田善人之稱事聞

世祖

章皇帝嘉其好義命大學士巴某表其閭

陳天祐天才

薊州人兄弟俱秉性謹恪誠朴崇頌未荒亂死者相枕藉二不捐資買地為義

塚收葬無主骸
骼數萬有奇

本朝

順治十年歲飢復如之州高士

李孔昭撰文於碑以紀其事

邢

澄

側文安人性至孝事親色養兼至親病日夜侍湯藥必嘗親歿哀毀骨立里黨推其誠孝

康熙初

班表

尹肅京

通州人貢生性孝友尤尚風義康熙初司訓吳橋以官舍傾圯賃居邑之劉氏宅見壁中

藏白金四甕戒弗啓立名

劉氏子還之卒祀鄉賢

任璽

誠文安人歲貢生繼母馬氏遇之虐璽誠孝感感動母卒悔悟璽遂為孝子

劉新第

文安人生數歲而孤母薛氏食貧守節新第稍長即知孝養竭力工作以供甘旨六十年

如一日鄉黨稱其純孝

王國華

文安人庠生父有疾湯藥必親嘗衣不解帶者歲餘而愈異母弟妹俱幼復為讓產製裝

以娛父志邑令嘉其孝友舉鄉飲正賓

解

潤

涿州人太學生父沒遺債千餘金人見其貧多不責償潤竭力經營所得悉以償債奉繼

母克盡孝養有孀孀及姊俱孤苦無依潤復力為周恤州牧顧欽給匾旌之

邢雲霑

文安人庠生五歲父遠遊漢中霑奉母家居母即世而父計至霑大慟徒跣走漢中遍訪

得之以頭觸棺棺裂破中指血滴骨觀者無不泣下負骸歸葬鄉人稱之

楊銓

宛平人幼孤撫於伯父長隨伯父任福建長樂丞伯父卒於官囊空路遠櫬不能歸銓典

妻為資負骨歸葬
見者無不垂涕

紀汝彛

文安人由貢生歷官江寧郡丞性至孝母病篤適身亦病猶手掬便液嘗之父喪年已七

十哀泣如嬰兒撫堂叔遺孤飲食
教誨終身無間康熙四年祀鄉賢

崔士瞻

霸州人為諸生有文名母疾號呼籲天願以身代及歿哀痛不欲生人咸目為孝子隣里

族黨有不能婚嫁者極力營助以子貴
贈雲南按察使康熙六年祀鄉賢

劉應全

宛平人性敦朴無偽康熙七年水災應全偕子懋恒捐穀二千七百石以備賑二十一年

旱災復捐穀一千石
俱經題請優敘

劉餘澤

保定人事親孝飲食必躬進終身勿懈遇大疫父母染病瀕危省視不離左右靜夜默禱

願以身代親亦漸瘥人謂孝感所致事叔父母盡誠敬以產讓諸兄弟一無所私以子貴贈戶部

主事康熙十一年祀鄉賢

岳毓粹

保定人貢生事父母色養備至中外稱之汪遷安訓導常見路有遺金候覓者不至遂分

以賑貧人平生恤孤濟困尤多隱行康熙十四年祀鄉賢

劉祚永

寶坻人庠生事親承顏怡志未嘗少懈母病躬侍湯藥衣不解帶者數月母卒事繼母亦

以孝稱康熙二十二年旌表

陳

銓

字國鎮涿州人親亡廬墓三年待兄弟克盡友愛卹孤寡賑貧窮輿論翕然稱之康熙二

十九年

祀鄉賢

賈光前

遵化州人。性孝友，樂善好施，捐脩學宮，義學遇荒賑飢，三施義塚。順治二年，以布衣

召見
恩賜四品服俸，候用。

康熙三十七年，祀鄉賢。

樊顯宗

文安人。孝親睦族，內外無間。言尤慷慨，尚義順治間，城西劫寇搶掠，子女捐金代贖，不責

其報。以子紹祚貴，贈御史。康熙五十三年，祀鄉賢。

劉芳喆

涿州人。進士，歷官國子監司業。性慈惠，居鄉賑恤孤寒，人多感頌。康熙四十二年

聖祖仁皇帝南巡過涿，芳喆迎謁道左，蒙召對嘉獎。康熙五十五年，祀鄉賢。

郝應正

字太和，涿州人。好義樂施，遇歲飢，當出粟賑貧，全活甚衆。康熙五十九年

聖祖

仁皇帝駕幸郭里口

路經巨馬河議建板橋乏料應正

所居有楊柳百餘株州牧備價向買堅辭不受任

其剪伐橋賴以成年八十見

雷應禹

通州人為諸生事親至孝撫諸弟妹務體親

龍任刑科給事中

封如

其官雍正元年祀鄉賢

王鼎呂

寶坻人拔貢生天性純孝年十七父母先後

先人友愛意卜塋葬父以伯叔父同葬焉撫從兄

弟子女如已出首捐索金倡修寶邑城垣及河堤

之傾塌者歲災收畜流民子女復以錢穀給其家

全活甚衆歲捻仍以子女歸之子燠任刑部郎中

封如其官雍正

正元年祀鄉賢

趙

植

涿州人貢生事親先意承志母歿躅踰
嘔血數升廬墓三年雍正二年旌表

李中倫

大興人有劫賊數十人昏夜入室執父廣生
拷逼財物中倫聞父難手無寸鐵奮身奔救

與賊格鬪遍體受傷即日
殞命雍正三年旌表

邊

溥

昌平州人年十九母值產難危急溥哀慟籲
天願以身代且許飲蓐血數升天仙祠去城

五十里時值天雨五步一拜往禱母遂
獲安年八十有三雍正十年旌表

永平府

元

趙

炳

字彥明惠州潯陽人幼失怙恃鞠於從兄歲
飢往平州就食遇盜欲殺之兄解衣就縛炳

年十二請代賊驚異舍之而去
中統間累官判北京宣撫司事

明

麴

祥

字景德其先永平人永樂中侍父百戶亮任金山衛祥年十四為倭人掠去遂仕其國宣

德中與貢使臣抵京上疏陳情乞歸省侍詔令暫歸仍還日本祥至金山獨其母存耳已閱二十年不能識驗耳陰赤痣始信未幾別去復請於國王再令入貢復申前請得襲職歸養以孝聞

馮

清

字士潔灤州人親喪廬墓三年手植松栢數百株成化時舉鄉試知鄆縣屏却饋遺時以

廉孝稱之

李彥思

永平人父喪廬墓八年不至家弘治中旌表

楊騰

遷安人為諸生幼孤母病目以舌舐之而愈及歿廬墓三年有水花結於盆礫如樹下人

拜伏墳前之象已芝草生焉隆慶中上聞詔立純孝格天華表於通衢仍給冠帶榮之

蕭富

樂亭人少孤事母孝母卒富以府吏供職不在側痛極嘔血終身言及淚與俱出仲兄積

私財獨泊然不置齒頰竟以祖居讓伯仲而自居他所隱不仕

劉文煥

字世英樂亭人幼孤事母孝妻盧氏亦孝於姑姑病籲天請代冬著單衣者三年病果痊

及姑歿欲廬墓文煥止之曰此為子事也自廬墓三年每日舉土三次墳可望數里嘗鑿井於墓旁汲以自爨不數尺泉水湧出人號為孝子泉

張解蘭

玉田人事繼母盡子道妻楊氏亦能孝養為鄉里所稱解蘭每赴親友禮筵必詣先人木

主前揖而後行反亦如之萬厯間邑中連年水澇人多流散解蘭鳴於當事倡率各莊開濬河道且捐米煮粥食之嗣後水由河歸民獲有秋全活甚衆

桑開基

玉田人邑諸生為人方嚴重倫常臨大節侃侃正論屹如山嶽事繼母孝遇諸弟友愛值

明季見時事不可為憤鬱而卒子三人皆庠生一門孝友

本朝

江山秀

玉田人前崇禎舉人由教諭遷咸陽令陞鎮江府同知少孤事母王至孝明季土寇竊發

負母避難徒步日馳百四十里足指為穿母歿後以祿不逮養為恨致仕後立家塾講學以獎進後學為己任士林宗之子象乾邑諸生本邑學宮明倫堂傾圮以父有志捐脩宦遊未逮象乾嚮產重

建不藉勸助咸謂克承先志父母歿居喪未嘗見齒事伯兄如父事必稟命而後行姑嫁無養置產給之其他重義樂施不可枚舉人稱山秀有子云康熙間父子俱祀鄉賢

崔聯芳

山海衛人順治丙戌舉人父出遊五年聞凶信不知死所值榜發膺鄉薦不顧厯四省尋

覓若有神示於確山縣得之負骨歸葬咸稱誠孝所感康熙五十五年祀鄉賢

劉光裕

遷安人性孝友撫孤姪嫁族女助喪掩骼賑飢施貧善行著稱為一時所欽重以子鴻儒

貴

贈兵部侍郎

康熙間祀鄉賢

韓坤業

永平府庠生父原潔病沒坤業侍母王氏守節四十餘載以孝聞母沒廬墓三年每日負

土成墳塚高如坵路人哀感康熙九年旌表

趙名元

撫寧人庠生事母以孝聞母歿哀毀骨立築廬墓側晨昏哭泣哀經未嘗去身三年如一

日康熙二十

年旌表

姚延嗣

樂亭人官國子監學正年未四十兩遭親喪哀毀過甚鬚髮皆白有舊家子以遭難鬻於

都下輸金贖之或負責不能償輒焚其券待人至誠教子弟以正心術尚實學為要康熙二十九年

祀鄉賢子熙貢生傳家孝友亦並祀焉孫協于進士

曹雲望

豐潤人貢生父任代州值姜瓖叛逆雲望率壯丁習冒矢石佐父成功父以疾卒於官扶

櫬歸廬墓三年事母家居或勸之仕不應母歿亦廬墓三年嘗出貲代人完國課其人感激願納女為妾却弗受亦不責其饋人以此多之建書舍數十楹於邑之西南隅教生徒先德行後文藝從學

者雲集康熙四十九年祀鄉賢

鄭相倚

豐潤人邑諸生事父母朝夕不離側生養死葬雖貧務竭其力兄弟四人友愛無間適買

一僕見其母依依不去輒給奉歸之人稱長者以子貴贈奉直大夫康熙四十九年祀鄉賢

張一躍

樂亭人任紹陽黃安令擢知黃平州以親老歸性孝友父應登庠下患毒瀕死一躍口吮

膿血殆盡而愈以兩兄子女多累一弟尚幼悉出已產讓之任紹陽時丁母艱湖撫以一躍撫綏有術欲題請奪情在任守制叩頭流血哀懇得已康熙五十三年祀鄉賢

趙天錫

昌黎人順治辛卯舉人事祖母至孝二親病卧三十餘年躬侍湯藥始終無倦容康熙五

十三年祀鄉賢

劉

一蛟

永昌黎人貢生父病衣不解帶者三載事孀母

者一蛟為措價出二十四口與婚嫁其他賑飢濟

乏尤多義舉學以源洛為宗士類無不仰之康熙

五十三年

祀鄉賢

孫

昇

撫寧人事親至孝父病湯藥親嘗衣不解帶

及歿哀痛幾絕葬後廬墓三年每日親炊哭

奠包土築墳鄉黨稱

保定府

北魏

石文德

中山蒲陰人有行義真君初縣令黃宣卒於

任單貧無期親文德祖父苗以家財殯葬養

宣妻二十餘載自苗逮文德刺史守令卒
官者制服送之五世同居詔標榜門閭

宋

榮恕旻

雄州歸信人兄弟異居積年大中祥符中恕
旻家榆樹兩本自合感其異因復相聚人共

稱其
雅睦

孫浦

保定軍人十世同居真
宗時旌表仍蠲其課調

元

郭希泰

清苑人學士承旨貫之父也養母盡孝遇弟
盡愛當營樓居或謂君有弟樓可二楹他日

易分也希泰謝曰兄弟天倫兄有即弟有
也奚為分天倫可容私乎人歎服而去

魏敬益

字士友容城人性至孝居母喪哀毀骨立素好施與有田僅十六頃一日語其子曰自吾

買四莊村之田十頃環村之民皆不自給今將以田歸其人乃呼村民歸之皆愕眙不敢受強之後可衆白有司有司以聞於中書丞相賀太平歎曰世乃有斯人哉

劉德和

雄縣人達朶兒只之變有二十三人避徙他邑官捕獲將斬之德和力辨其無辜得免歲

荒人剝樹以食德和漁易河取廩糜雜烹之以給餓者活數千衆

王庸

字伯常雄州歸信人母李有疾夜禱北辰叩頭出血母卒露處墓前旦夕哀號一夕雷雨

暴至隣人持席蔽之見庸所坐卧之地獨不沾濕咸歎異而去

明

胡

斌

雄縣人洪武末雄被土寇劫掠骸蔽野行
者心悸斌一人荷荊筐往瘞之披霜冒雪越

六旬而事竣男女各為叢塚
其他善行尤多至今傳頌

邊

靖

慶都人由太學生除廣寧衛經歷性至孝父
歿哀毀幾絕及葬負土成墓廬墓六年環植

以樹歲旱不雨靖日汲水灌之俄有泉
湧出道傍足以灌溉事聞詔旌其門

黃

鍾

慶都人自鍾以上六
世同居正統間旌表

吳

犇

清苑人景泰舉人官中書性敦孝友樂施予
父疾嘗糞以驗瘡劇薄官祿餘分惠宗族歲

荒族人不能自給者罄貲易粟以
濟之鄉里兒童婦女皆識吳中書

張紹烈

字孟晦容城人為諸生師事李伸甘貧苦節
仲歿廬於墓側以終心喪慕劉靜脩之學日

誦其遺文以自樂弘治中以布衣詣闕上疏請潔
牲牛御經筵抑奔競毀淫祠脩馬政切中時弊孝
宗允行之正德初疏請斥宦官番僧武宗為優容
賜冠帶榮身京師好事者繪為皇都獨諫圖逆瑾
用事烈又上疏千餘言詔下獄數日釋之歸七日
而卒平生所藏書籍不火自焚遠近莫不歎異

師道南

字從時安肅人嘉靖時以諸生累封高唐守
少倜儻晚乃篤謹孝養二親不以甘旨需昆

弟曰若貧也且分既析之產以予之曰
昆弟弗飽二親弗飽也人咸稱為孝友

劉敬

蠡縣人給事中穆之兄子也穆以強諫忤旨
擬辟敬纔十餘歲擊登聞鼓奏言無後願以

身代上嘉其義
赦穆復其官

董得祿

雄縣人有至行嘗令人浚井得錢盈窟得祿
曰人生願忠孝安用阿堵物耶遂舍不治

郭良時

字靜宇東鹿人讀書樂道足不履城市家故貧讓產於弟設帳授書以餬其口惡少鬪里

巷排解不息望見良時曰郭公來矣亟走匿盜夜刈人禾隣田俱盡良時禾獨存其為人推重如此

劉寧

容城人耕釣為業樂善好施荒歲胥骼遍野持器築埋之以已所入多方濟人賴以全活

者甚衆

劉惟恂

字小松清苑人父卓宦兗州惟恂歲時定省往來多徒步吏胥皆不知為官子居鄉遇不

平事輒義形於色雖貴顯無所屈當曰男子頭項抗直豈能作泰參低昂乎以貢入太學不仕後以

子不盈貴贈布政司叅政

郭名揚

字賓實清苑人為諸生事父及繼母雷以孝聞天啓中魏璫擅權建祠滿天下邑在畿內

告成者競不日郡守不欲為亦不克抗咨於名揚名揚曰陽重其事而陰緩之璫不久敗可無染也守然之卜地庀材數置未幾璫敗建祠者皆得罪守獨全其識畧類如此

鹿化麟

第一定典人太常卿善繼之子天啓辛酉鄉試舉

養不就太常以定典城破殉節化麟尋以毀卒子盡心旨優卹贈大理卿謚忠節

崇禎丙子舉人山西安邑知縣有令政

本朝

孫奇彥

容城人奇逢弟生而端敏髫年從諸兄廬墓

冒險引救釀金完誣坐賊義聲震一時順治初以貢生令武城有循蹟著書亦富

宋

鎭

容城人邑庠生生四歲而孤母孫氏堅志苦節撫之成立孫卒鎭廬墓朝夕哭拜竟卒於

廬

子允詮痛父死孝亦廬墓

三年人稱其以孝繼孝云

張吉大

東鹿人邑庠生有孝行順治初賊劫於家執父邦輔拷索將殺之吉大挺身罵賊格鬪遇

害

路開泰

東鹿人順治初賣產贖父天運於滿洲家與母完聚後父母相繼卒傾家殯葬衣食不給

處之晏然
鄉里稱之

王三錫子學詩

完縣人少孤孝事繼母妻邊氏亦能善事其姑明末兵燹三錫負母奔逃

為兵追逼詢係母子義而釋之入本朝順治初土寇竊發迫令入夥不從被害子學詩備

工葬父亦以孝聞康熙十七年父子同奉 旌表

韓鼎藩

字貢九高陽人順治丙戌武進士性至孝母病衣不解帶者兩月居喪亦遵古禮初任守

備遷都司未任卒祀鄉賢

劉興

清苑人邑諸生性至孝每讀書過夜分必問安視寢親喪喪廬墓朝夕進食如生時尤好施

予教義行有某喪母欲鬻子襄葬興嘉其行捐金助之俾其完聚不責其報或以構訟行賂於興正色叱之以手指天曰此不可敗也其人慚而退以子耀微貴封兵部侍郎兼右副都御史康熙三

十二年祀鄉賢

高濤

清苑人為諸生文章一本六經家極貧其葬祖母及父母悲出舌耕撫幼弟極友愛高陽

相國李蔚銘其墓謂以忠孝為世表以文行為人師云以子桂任禮科給事中封如其官卒祀鄉賢

常四明

雄縣人性孝事繼母袁如所自出袁壽九十

里化之有閭閻者咸私相謂曰母使常公知也冬月置纊以衣寒者傾貲賻喪無德色邑當南北孔道每解囚經其地給以餅二枚青蚨十文行之四十年如一日平生樂人之善成人之美遠近翕然稱之舉充鄉飲賓卒祀鄉賢子紳進士官儀部郎孫珩舉人

辛起尹

新安人歲貢生有至行父歿哀毀骨立事母色養備至母病侍湯藥衣不解帶者三月及

歿擗踊號痛幾絕撫弟升尹姪懋脩愛踰於子弟病背疽親為口吮得愈順治初新邑連歲荒歉起

尹捐賑施粥全活甚多官靜海訓導卒康熙十六年祀鄉賢

李顯名

字裕德新安人邑諸生年甫八歲遭閹賊之變父母不能顧捨之去顯名於戎馬中循轍

跡尋親於三百里得之己丑又遭土寇父守邱墓令奉母避地外家常於橫屍被野時一首父比至

已三更矣父驚且痛旁人亦無不歎異後父母病籲天求代歿盡哀素食終其喪性慷慨尚風義濟

困扶危日不暇給以至產落嘗自灑然曰吾家自司農公素傳清白即以清白遺子孫亦先人志也

顯名幼失學年十七始折節讀書一時老宿靡不敬服深得程子知一尺不如行一寸之旨故其平

生所尚實行為先教子孫有家法康熙五十八年祀鄉賢

鄭景洛

博野人康熙庚辰進士因父病博覽醫書遂知醫初任山西石樓令親病乞終養不得聞

計冒暑奔歸竭力營葬齒落髮白猶孺子泣終日人稱為真孝子雍正七年旌表

王廷輔

安州人庠生事親克盡孝養母喪飲食不入

繼母止之仍居二門外三年事繼母如所自出先是順治七年土寇劫掠婦女流離廷輔俱出資收養尼庵或使人送歸或招人認領遠近皆以古君子稱之雍正八年旌表

王之楨

安州人庠生自幼能體親心人以曾子伯奇比之居父母喪不飲酒不茹葷三年不至私

室父歿事繼母愈孝謹居鄉施藥救人煮粥濟貧尤多善行雍正八年旌表

王又會

安州人太學生考授州同知七八歲時值歲歉家食糠粃父憐其幼以確煮粥食之曾不

敢獨食母喪哀毀骨立淚盡繼血三年未有笑容奉父愈謹父患便澁手採取親自嘗之鄉黨稱為

純孝雍正八年旌表

劉公舉

安州人邑庠生四歲而孤稍長事母盡孝母患火症九年卧床不起朝夕侍奉無倦色母

歿僻踊號慟屢絕復蘇負土築墳路人哀感雍正八年旌表

李明性

彝縣人庠生父母年俱八十餘每侍疾不脫冠衣久者數月居憂三時不食菜羹三年屏

酒肉居廬不入中門晨興必至墓所號涕前後六年如一日卒士友私謚孝愍先生雍正十年旌

表子塔承學於博野頗習齋砥躬行習六藝與蕭山毛西河論樂律江左方望溪質三禮大興王崑

繩治古文西歷秦龍南游江浙學士多嚮之舉康熙庚午鄉試官通州學正與修

畿輔通志未

竟而卒

蕭玉藻

容城人性至孝父病藻日夜侍左右目不交睫湯藥必嘗及沒哀毀骨立廬墓三年後母

沒亦如之雍正
十一年旌表

劉勝義

安肅人業市炊餅有鹽賈杜曄過其肆遺銀
十六兩有奇及覺尋至勝義如數還之却謝

不受雍正十二年總督李衛上其事遵
旨酌議賞給銀二十兩

河間府

南北朝魏

邢晏

字初平河間鄭人撫軍將軍巒之弟博涉經
史篤於義讓初為兗州刺史例得一子釋褐

乃啓其弟子子慎為朝請後為滄州復啓其孤兄
子昕為府主簿而其子並未從宦世人以此多之

北齊

楊

慶

字伯悅河間人祖元父剛並以至孝聞慶舉

孝廉以侍養不赴母病不解襟帶者七旬母

歿負土成墳文宣

表其閭賜粟帛

宋

李

璘

河間人晉開運末有陳友者乘亂殺璘父乾

德初璘隸殿前散祗候友為軍小校相遇於

道璘手刃友不遁去自言復父

讐按鞠得實太祖壯而釋之

李罕澄

阜城人七世同居漢乾祐中旌其閭太平興

國六年長吏以漢賜詔書來上復旌表之

高

珪

莫州人八世同居真

宗時旌表蠲其課調

元

段文瑞

河間人讀書奉母盡孝母歿哀痛踰禮以手履地行一里外負土營墳百五十日始成朝

廷表其門授
本路學正

明

劉

敏

字好學肅寧人以孝行著洪武中舉人為中書吏時以小車出龍江市蘆葦令妻織蓆鬻

以奉母後為楚相府錄事值中書以沒官女給文臣家衆勸其請給奉母敏曰事母乃子婦事何預他人官終
徽州同知

黃文

任卯人生甫週父經商出越十四年不歸文既以諸生貢入太學詢知父在鄧州徧訪得

之請歸不允後文推判冤州迎之始
歸與母完聚孝養備至天順中旌表

杜

蕙

字德馨仕印人正德進士歷麗江府同知四
世同居父喪廬墓三年母年九十九蕙年八

十二侍奉不懈歿亦廬
墓三年卒時年九十七

褚

環

交河人舉人父亡廬墓三年邑令欲
請表其門固却之後仕長安知縣

劉

端

吳橋人幼孤及長與妻竭誠事母母歿結廬
墓旁擔土培墓日不再食哭泣之聲達於衢

路聞者悲酸迄今塚高丈餘
過其下者皆指為孝子墓云

侯

秀

故城人幼孤繼母何偏愛其子女秀孝謹無
違家貧漁樵供養何死竭力營葬攜弟妹廬

墓所弟溺死哀號不已妹及笄
善嫁之鄉人名其村曰孝子村

霍德行

東光人少有至行事親色養兼至甘旨不缺撫兩弟友愛無間其他建宗祠置義渡善行

尤多以歲貢官涉縣訓導陞潘陽衛教授

紀賢

字若愚任邳人少孤常窘乏不能存竭力事母弗辭勞瘁弟四人呱呱仰給維持以至成

立一文尺帛不私妻子終其身同爨者五十餘人母病篤憂悴忽夢人貽清眉灣水飲之遂愈人以孝感所致著有家範數十條及讀史詠情諸集

蘇就大

交河人由歲貢歷授大城饒陽元氏三邑學博教士務敦實行擢藍田令奉經術為更治

興脩水利民德之為立祠報功居家孝友克敦語及父母輒流涕讀書耄耋弗倦著有麟經傳意行世里人以其父字子康稱為肖康先生

孟尚質

其先澤州人徙交河家焉尚質年十六父傳客死於淮聞訃日夜跣馳百餘里水漿不入

以號泣悲哀見者俱為流涕事母王孝謹里居善化鄉人有鼠竊者諭以義理予之資本俾有營業其人慚謝終身不復為盜商人陳某過其地遺金三十兩尚質得之守不去俟陳還索歸之卒祀鄉賢子兆祥孫章明同殉甲中國難另載忠節

本朝

李天經

吳橋人萬曆癸丑科進士依依膝下不肯筮仕兩親強之出歷官多惠政

本朝定鼎

詔求遺老之在籍者天經應

召入見授通政使未幾致仕自先世以來頗有積儲貧者待以舉火貧病賑飢出粟濟餉改脩磚城闔邑德

之壽八十一

卒祀鄉賢

白惺涵

河間人順治己丑進士官至吏部考功郎中當前明崇禎壬午河間城陷惺涵與其父皆

被執將就办惺涵解衣請代情辭懇切軍中義之得俱釋康熙十二年祀鄉賢

賈錫穎

景州人順治六年強賊王小廷夜劫殺錫穎父光彛並祖母周氏伯光顯光祖時錫穎方

十四歲伏暗處窺之以力弱不敢發後小廷招安回里謂錫穎曰非我存若安有今日若當德我錫穎佯謝之越二年錫穎年十六矣值四月八日里社舉神會錫穎伺小廷於酒肆詳飲從背刺之洞胸隨斷其頸摘其心奔赴父墓哭奠畢自首於官當事得實義而釋之

劉梅

字訓夫故城人順治戊戌進士除教授累遷至江常鎮分守道幼失怙哀毀盡禮鄉薦後

承順母意杜門六年時依膝下常分俸為兄置產捐貲為姪資生一時咸服其義康熙十六年祀鄉賢

左鵬程

河間人孝慈克敦操脩瑩淨以子貴贈翰林院侍講學士康熙四年祀鄉賢

劉清漣

故城人孝事父母調護不怠親喪哀毀絕而復甦友於兄弟讓膏美取礫薄好施樂予周

急扶危殆無虛日以子貴

贈戶部郎中祀鄉賢

賈

潤

故城人事孀母撫孤姪內外無間設義館以成後進置義塚以收遺骨懿行甚多研精經

史所學尤邃以子貴贈廣西思明同知祀鄉賢

馬廷宣

東光人拔貢生孝事繼母遠扶兄輓贖歸宗妹不惜貲不靳力人稱為難祀鄉賢

李魁春

仕邳人邑庠生天性真摯事親承顏養志曲得繼母歡心時人號曰李子爲明末荒旱出

粟二千石周濟窮困數鄉之民全活甚家康熙三十二年祀鄉賢

張

咸

景州人邑諸生幼失恃常趨墓前環泣聞者俱爲酸鼻家貧古耕養父體無全衣而親極

滋味父病痢瀕危咸與妻賈侍床褥嘗湯藥不解帶者終月人稱其孝性甘澹泊不可干以非義有同鄉親醜一居宅值千金却之其節介如此里中稱文靜先生雍正元年祀鄉賢

李世奇

景州人家貧爲人牧牛路拾陝客李建元行李盤費三百餘金交官給還不受酬謝雍正

六年奉

旨准給八品頂帶賞銀五十兩

天津府

唐

許法慎

滄州清池人甫三歲母病不飲乳慘慘有憂色或以珍餌詭悅之輒不食還以進母後親

喪常廬於塋有甘露靈芝木連理白兔之祥天寶中表異其閭

宋

胡元興

滄州人母死負土成墳太平興國中詔旌門閭

崔

諒

滄州人七世同居貞宗時旌表仍蠲其課調

明

楊

圮

青縣人父先歿母亦繼卒葬畢就塚側畧成草舍終日茹素朝夕進香增土其塚遂高如

卽塚後有田數畝獨為耕斂衣食自給三年不受妻子之養

鄭惟需鹽山人事母劉氏孝母未食者不敢食母卒哀毀過禮及葬乃穴處於墓者三年又於墓

傍種瓜以施路人

向

化靜海人父上為衛指揮生罪憤極投海死化求屍不得亦投海忽上屍浮出衣服盡脫頃之雷雨驟作化首頂父衣浮之一處衆皆駭異共收葬之

呂

詠滄州人庠生篤於孝行生養死葬簡盡其道事孀孀撫孤姪一體無間躬任捍禦孤城獨全抑儒紳優免之請賦役維均滄人德之

本朝

劉得寧

天津人順治初年飢出粟賑濟活難民數百口葬埋無主骸骨無算事聞

詔

賜

八品服以旌之年八十六卒

朱天成

天津人順治初捐粟賑濟三月全活甚衆兩院具疏以聞

詔

賜

八品服以旌之年七十九卒

張文元

大同人寄籍天津順治十年天津被水文元捐貲賑荒全活災民以數萬計撫院上其事

詔

賜

八品頂帶以旌之

陳奉勅

滄州人性至孝父歿隻身廬墓朝夕哭奠三年不離墓側童叟見者皆為感泣事聞旌表

劉永昌

鹽山人舉人有義行常遵父遺命捐田三百畝作義田濟閭族婚喪又以四十畝作社田

為義館師生薪水之
費康熙五年祀鄉賢

柴堪棟

南皮人邑諸生性至孝父母年登九旬色養備至友愛庶弟以所應得產讓之女適郭早

婦撫周歲兒內患外侮無不備當棟極力保全得全苦節遇事尤慷慨見義必為為鄉里所倚重以

子貴

贈吏部考功郎中

康熙

三十八年祀鄉賢

王

敬

鹽山人國子生孝以事親義以教族脩學宮以培多士造橋梁以濟行人捐囊周急焚券

還田

懿蹟甚著譽望翕

然雍正二年祀鄉賢

畿輔通志卷八十